

LUKA ENA EVANELIA

¹ Teopilo e, doha tatao headi edi nuatu si ene bena ginauri ta sunusunumaedi wa si uri hemasarahadi,

² doha hinage se ledima arida eai isi huia hetubuna eai ginauri wa taitadi, eo riba wa taulauguguaena tataodi;

³ ginauri gamagaridi huia bagubagunadi eai wa, eau hinage ea nuatukomakomanidio, arinai, ea 'ne i lolo hinage ea uri heaheasadi oa arim eai.

⁴ Teina ginauri ta bena u nuatuwataididini, doha hinage se ribahasahasaim'o wa.

⁵ Heroda, Iudea wasawasa, huiana eai, kohena esau esana ede Sakaria, ia Abia bogana: ia monena esana ede Elisabeta, ia Arona bogana.

⁶ Taudi labui, Eaubada matana eai edi laulau se dudurai: Guiau ena laulau eo ana sanapu gamagaridi se lauwataidi, se lolo.

⁷ Isi nige natudi: Elisabeta i agari, eo taudi labui edi borimai se gamagari ariri.

⁸ Ena huia kohena eai wa Eaubada matana eai i paisoaei.

⁹ Kohena edi laulau doha meta, isi se lau Guiau ena dubu tabuna alona eai muramura panepane se gabu.

¹⁰ Huia wa muramura panepanena se gabu tatao moutuadi lailai murimuri eai se laulau-uura.

¹¹ Ia arinai Guiau ena aneru esau i taumasaraha muramura panepanena wa hatahatana teha tuna eai i totoro.

¹² Sakaria ia ie ita nuana i ponopono, aruana ie loi.

¹³ Aneru abo i ribalau ia arinai i ene, “Sakaria e, tabu u matausi: em uura se ataieyao; monem Elisabeta abo i haisu natum tau abo i leawa, ia esana abo u tore Ioane.

¹⁴ Abo u nuawoiwoina eo u kode: ia abo se labasi wa debana eai tatao gamagaridi hinage abo se kode.

¹⁵ Paana Guiau matana eai ia abo i sae, waina eo nomnom gigigiboridi taba nige i nomdi; na Earua Tabuna arinai abo se hemonau sinana bogana eai i laoma e.

¹⁶ Isaraela nanatunayao moutuadi abo i hesinibuidi Guiau edi Eaubada arinai.

¹⁷ Ia Guiau matana eai abo i edabaguna Elia ena laulau eo ena gigibori eai, tamadiyao nuadi bena i heasibuidi nanatudiyao aridi eai: eo tauawaawayagara hinage nuadi bena i heasibuidi taulaulaududurai edi sonoga dobiladi eai: tatao bena i henonohaidi Guiau enana.”

¹⁸ Sakaria i ribalau aneru arinai, i ene, “Wau wa ginauri edohana abo ea nuanuatui? Ea tau-taubadao, eo monegu hinage ena borimai se gamagari.”

¹⁹ Aneru arinana i heuio i ene, “Eau Gaberiela ina, Eaubada matana eai ea totoro; na se hetamariguma bena enam ea riba, bena teina wasa lolona ta ea heribam.

²⁰ E oa abo u unauna, taba nige abina u ata riba esau u ribaei i lau e asubenana eai ginauri ta abo se tubu, paana egu riba nige u awamamohoiedi, ia ede abo se tubu edi huia eai.”

²¹ Tatao wa Sakaria se bagiwatai, se noo paana huia lohaloha dubu tabuna alona eai ie bawa.

²² I taulagama murimuri eai, bena i riba to nige arinana: se nuatuiyao numa tabuna alona eai ia ginauri esana ie ita: paana i nimaoidi, eo nige arinana hinage.

²³ Ana paisoa asubenadi se ohi, ie lau ena numa eai.

²⁴ Nei asubenadi muridi eai ia monena Elisabeta ie boga, nawalai haligigi i miayamui, i ene,

²⁵ “Nuana Guiau ena abiabigu doha ede teina, agu iwala tatao matadi eai abo i abihai.”

²⁶ Nawalai hehaligigi-esegana eai aneru Gaberiela wa se hetamariama, Eaubada arinai i laoma Galilaia eanua esau eai, esana Nasareta.

²⁷ Hasara nuanuasupu esau arinai, ia se awaawaduduei tau esau arinai, esana Iosepa, ia Davida bogana; wau hasara nuanuasupuna wa esana ede Maria.

²⁸ Aneru wa i laoma ia arinai i ene, “Eauedo, oa se hede-basaem, Guiau maem: sisine aridi eai oabom u sae!”

²⁹ Hasara wa aneru ie ita ena riba wa nuana i ponoponoiei, i heunaboisaha, i ene aitoi sahasaha ina?

³⁰ Aneru abo i ribalau ia arinai i ene, “Maria e, tabu u matausi: Eaubada arinai oa se hede-basaem.

³¹ Oa abo u boga, natum tau abo u labasi, ia esana abo u tore IESU.

³² Ia abo i sae, ia esana abo se tore Saesaedaoina Natuna: ia tamana Davida ena terona Guiau Eaubada abo i mosei ia arinai.

³³ Iakobo boganayao ia abo tanuagadi eai i lau e nige nosina; ena basileia hinage taba nige ena abalautom.”

³⁴ Maria abo i ribalau aneru arinai i ene, “Wau wa abo edoha egu abiabina, eau nige monegu?”

³⁵ Aneru arinana abo i heuio i ribalau ia arinai i ene, “Earua Tabuna abo i dobima, Saesaedaoina ena gigibori abo i helogulogum: arinai hinage meta ginauri tabuna wa abo u labasi esana abo se ribaei Eaubada Natuna.

³⁶ Am bogaoyao-sinena Elisabeta i sinesinebadao, hinage ie boga abo i haisu tau, ia i agari wa ena nawalai harigigi-esega se lauo.

³⁷ Paana ede Eaubada nige ginauri esau ie deha, abo i ginauri.”

³⁸ Maria abo i ene, “Eau ina, Guiau ena heaheari sinena; u ribaei wa besi abo i tubu arigu eai.” Aneru ia abo i laugabaei.

³⁹ Nei asubenana ne Maria i torohai, i lau heuheula oea tupidi eai, eanua esau Iudea eai,

⁴⁰ i awasae Sakaria ena numa eai Elisabeta i aitoiei.

⁴¹ Elisabeta Maria ena lautoi i ataiei, natuna bogana eai i lamposi; Elizabetha Earua Tabuna i monau

⁴² i ribalau arinana lailai i ene, “Sisine aridi eai oabom se hedebasaem, bogam aniona i sae ariri!

⁴³ Egu lolo saha egu Guiau sinana i laoma arigu eai ta?

⁴⁴ U aitoiegu wa, arinam beagu eai ea ataiei, kaimou bogagu eai ie kode eo i lamposi.

⁴⁵ Sunusunuma sinena abo i nuawoiwoina, meta ginauridi Guiau ia i heriba wa, abo hinage se hemamohoiedi.”

⁴⁶ Maria abo i ene,

“Guiiau nuagu eai ea hedebasae.

47 Eo earuagu ie kode Eaubada, Tauhemaurigu arinai.

48 Ena heaheari sine epoeposisina i nuaamnaei: ina ta i lau e isina gamagamagari abo se riba loloegu.

49 Paana ede taugigibori ginauri saesaedi i hetubudio arigu eai, esana tabuna ede.

50 Ia matausina taumatausi abo i nuatoatoadi i lau e hari isi, hari isi.

51 Ia nimana eai ena adidiri i hemasarahayao; tauribaribahetausaeuioidi edi nuatu gaibu arinai i hetatagorigoridio.

52 Tatao saesaedi edi abababawa eai i heguridio: tatao epoeposisidi i hedebasaedio.

53 Tauguriguriam ginauri lolodi eai bogadi i hesesedio: taumonamonaune i hetamariuioidi ma nima ahaahadi.

54 Ena heaheari Isaraela i saguiyao, ena nuatoatoa i henuaisini.

55 Doha i ribaeyao wa tamadayao aridi eai, Aberahama arinai, eo tumanayao aridi eai i lau e nige nosina.”

56 Maria nuana nawalai haiona Elisabeta arinai ie mia, abo i uio ena numa eai.

57 Elisabeta ena huia labalaba abo ie lage; natuna tau i labasi.

58 Helena taumia eo ena dodogayao Guiau ena nuatoatoa lailai wasana se ataieyao; maedi se kodegogoesege.

59 Asubena hehaligigi-haionana eai se laoma merumeru wa bena se heperitome; esana se torelaei Sakaria, tamana esana se helaudamai.

⁶⁰ Ia sinana arinana i heuio i ene, “Nige’e; ia esana abo Ioane.”

⁶¹ Se ribalau ia arinai si ene, “Am bogao nige esau esana doha meta.”

⁶² Se nimanimaoui tamana arinai, si ene, “U ene gama ta esana?”

⁶³ Abauriuri i aiboda, abo ie uri, i ene, “Ia esana ede Ioane.” Gamagaridi se nooei.

⁶⁴ Ma esega abo ia awana i dabari, eo memenana i moimoiu, abo i ribariba eo Eaubada i aihelahui.

⁶⁵ Heledi taumia gamagamagaridi matausi i abiunuidi: teina riba gamagaridi ta wasadi se helai i lau Iudea oea tupidi eanuadi se hetaiiridi.

⁶⁶ Wau riba tauataiena gamagaridi isi se nuatuwatai, si ene, “Teina gama ta abo i hemala saha! Guiau nimana ia potana eai.”

⁶⁷ Tamana Sakaria Earua Tabuna i monau, i riba peroveta, i ene.

⁶⁸ “Guiiau Isaraela edi Eaubada se aihelahui; Paana ena tataoyao i aitaumanaidi, eo i lebohaidi.

⁶⁹ Mauri donana esau i lauisini enada ena heaheari Davida bogana eai.

⁷⁰ Doha ena peroveta tabuna awadi eai i ribaei, tanoubu huia hetubuna eai wa i laoma e huia ta:

⁷¹ ada waiunu nimadi eai abo se hemauida, eo isi gamagaridi se ouyalayalaeda nimadi eai hinage;

⁷² nuatoatoa se ribahesunumayao tamadayao aridi eai abo se hetubu, eo ribahesunuma tabuna abo ta nuatui.

⁷³ Aigora i aigorayao tamada Aberahama arinai,

⁷⁴ enada abo i leama,

ita ada waiunu nimadi eai abo se abihemaurida ia bena ta heaeaei taba nige ta matausi.

⁷⁵ Ia matana eai ma hetabuda, eo ma laulaududuraida; eda mauri asubenadi gamagaridi eai.

⁷⁶ Gama e, oa esam abo se tore Saesaeairina ena peroveta:

paana Guiau matana eai abo u lau baguna ena eda u abinonohaidi;

⁷⁷ abihemauri nuatulobaina ribana u mosei ena tataoyao aridi eai

edi baeae ribagigirina debana eai.

⁷⁸ Eda Eaubada ena nuatoatoa lailai debana eai; arinai mara-ie-tom sasasari i laoma ewa eai, i sinaida.

⁷⁹ Isi masigiri boeana eai se bawa, eo mate loguloguna eai hinage, ia abo i hemaradi,

labini edana eai abo aeda i woeaidi.”

⁸⁰ Gama wa ie tubu, i lau e i sibasiba, nuana abo hinage i adidiri, maratupama eai ie mia i lau e asubenana wa Isaraela matadi eai ia abo se hemasaraha.

2

¹ Nei asubenana ne Kaisara Aoguso ena lauga-gaeo ribana esau i lauhesomdi, tanoubu se ohihai esadi abo se lau-uri.

² (Se uri bagunai Kurenio, Suria gavanana, huiana eai.)

³ Tatao gamagaridi se laulau edi eanua mamohoi eai esadi se lau-uridi.

⁴ Iosepa hinage Nasareta, Galilaia i laugabaei i sae Iudea, Davida ena eanua esau ede Betelehema; (paana ia Davida tubuna eo bogana:)

⁵ maena Maria se sae esadi se lau-uridi, monena sora nige i tawasorai, ia ie boga.

⁶ Taudi labui metai se mia, ena huia se ohi abo i labalaba.

⁷ Abo i haisu ealahou tau, ia lulu eai se suma, bulumakau edi abaaiai hatahatana eai se tore, paana numa alona eai nige susuana.

⁸ Mamoe tautawataidi headi nei oea eai ne se mia, edi mamoe eawoidi se itaitawataidi maiona eai.

⁹ Guiau ena aneru esau i laoma aridi eai, Guiau namanamarina i sinahetairidi; isi abo se matausi ariri.

¹⁰ Aneru i ribalau aridi eai i ene, “Tabu au matausi: paana wasa lolona ea leama ta, abo au kode ariri, eo tatao gamagaridi enadi.

¹¹ Wau ta Davida ena eanua eai Tauhemahe-mauri se labasi, ia ede Keriso Guiau.

¹² Heiheinoina ede meta; Bebe abo au lobai lulu eai se suma, bulumakau edi abaaiai hatahatana eai se heota.”

¹³ Ma esega galewa tataodi moutuadi aneru maedi se heoiesegaidi Eaubada se aihelahui, si ene,

¹⁴ “Dimo ewa puripurina eai Eaubada se hede-basae eo tanoubu se loni, ena nuatu lolona tatao aridi eai.”

¹⁵ Aneru wa se laugabaedi se uio galewa eai, mamoe tautawataidi se ribariba si ene, “Ta torohai, ta lau Betelehema eai wau ginauri wa ie tubu wa hage ta ita, ia ede Guiau i heriba nonohaida wa.”

¹⁶ Se lau heuheulama Maria eo Iosepa se lobaidi, bebe hinage bulumakau edi abaaiai hatahatana eai se heota.

17 Se ita nonohai abo gama wa ribana aneru se heribadi wa abo se wasaduaiei.

18 Isi wau riba tauataiena wa mamoe tautawataidi edi riba se nooedi.

19 Na Maria teina ginauri gamagaridi i abidinidi, eo nuaboeana eai i nuatuwataidi.

20 Mamoe tautawataidi abo se uio, ginauri gamagaridi se ataiedi, eo se itadi doha se heribadi wa, aridi eai Eaubada se hedebasaei eo se aihelahui.

21 Asubena haligigi-haiona se ohi gama wa abo se heperitome, esana se tore ede IESU, doha aneru i tore nonohaiyao sora nige sinana i abiabi.

22 Ena asubena headi wa se ohi, doha Mose heaa laugagaeona i ribaei wa, ia abo se bahesae Ieruselema eai, bena se mosei Guiau arinai;

23 (Doha Guiau ena laugagaeo eai se uri, si ene, “Ealahou merumeru tatao gamagaridi Guiau arinai u hetabuedi;”)

24 Aitalasam se ginauri doha Guiau ena laugagaeo eai se ribaei, “Bunebune labui, e gabubu labui.”

25 Na, tau esau Ieruselema eai ie mia esana ede Simeona; ia ede tau wa ena laulau se dudurai eo Eaubada matausina i matausi, ia Isaraela abahenuabigadi i bagibagiei; Earua Tabuna ia potana eai ie ota.

26 Earua Tabuna tau wa i heribanonohaiyao, mate taba nige i ita, Guiau ena Keriso sora i ita bagunai.

27 Earua Tabuna ia i woeai numa uura alona eai: tamana, sinana, merumeru Iesu se leama bena laugagaeo laulauna se abiwatai.

28 I abilau nimana eai i labasi, Eaubada i aihelahui, i ene.

29 “Guiau e, em heaheari tauna abo i lautom ede ina, ma nualologu,

doha hinage u ribaei:

30 paana em abaabihemauri matagu eai ea itayao.

31 Ia ede u abinonohai tatao gamagamagaridi matadi eai;

32 marana eai arinai Etene abo se hemaradi, Isaraela tataodi edi abahedebasaedi.”

33 Iosepa eo ia sinana meta ginauri ia arinai se ribaedi se nooedi.

34 Simeona isi i aihelahuidi, i ribalau ia sinana Maria arinai, i ene, “Teina merumeru ta debana eai Isaraela eai gamagaridi abo se beu, eo gamagaridi hinage abo se toro; eo ia heiheinoina hinage abo se alaliuliuai;

35 (Mamohoi, elepa hinage nuam abo i gorilapai,) tatao gamagaridi edi nuatu abo se hemasarahadi.”

36 Peroveta sine esau esana ede Ana, Penuela natuna, sine wa Asera bogana eai: i sinesinebada ariri, ma hasarana eai wa monena arinai ie mia borimai haligigi-labui;

37 borimai tataohasi-se-mate-hasi ie wabu, numa uura nige i laugabaei na maiona to asubena i aiudi eo i lau-uura, Eaubada i heaheaiei.

38 Ia i taulagama Eaubada i lautoiei, isi gamagaridi Ierusalem a bihemaurina se bagibagiei, kaimou ribana i heribadi.

39 Guiau ena laugagaeo laulauna gamagaridi se abiheohidio, abo se uio Galilaia eai, edi eanua mamohoi Nasareta eai.

40 Gama wa ie tubu, i lau e i sibasibaohi ia abo i adidiri, eo i nuagilogilo, Eaubada ena nualolo ie ota ia arinai.

⁴¹ Pasova mataasina huiana eai borimai gama-garidi tamana, sinana se saesae Ierusalem.

⁴² Ia ena borimai saudoudoi-labui, mataasi abi-abina wa se sae Ierusalem eai.

⁴³ Asubenadi se ohi, abo se uiouio, gama wa Iesu Ierusalem eai ie bawa, Iosepa eo sinana nige se nuatui.

⁴⁴ Si ene bena maedi se lau, asubena esega se uiouioi ehadiyao boeadi eai ia se eooasaeai.

⁴⁵ Ia nige se lobai arinai se uio Ierusalem eai se eooi.

⁴⁶ Asubena haiona se ohi, numa uura alona eai se lobai sonoga tataodi boeadi eai ie bawa, edi riba i ataiedi, eo i hesihesiolau aridi eai hinage.

⁴⁷ Gamagaridi ia arinana se ataiei, ena sonoga, eo ena riba heuio, se nooedi.

⁴⁸ Ia se ita se nooei, sinana i ribalau ia arinai, i ene, “Natugu e, edoha em abiabimai? Tamam eo eau ai eooeoonuanuadubuem.”

⁴⁹ Ie ribalau aridi eai, i ene, “Aue saha au eooigu? Nige au nuatui tamagu ena hewau ta taba ea abi?”

⁵⁰ Wau riba wa i ribalau aridi eai nige abina se ata.

⁵¹ Maedi abo se lauesega, abo se lage Nasareta eai, i awaabiedi: ia sinana teina ginauri gama-garidi nuaboeana eai i toreyamuidi.

⁵² Iesu i sibasibaohi, tauna hinage i tubu lolo, Eaubada eo tatao ia se gadosisiei.

3

¹ Kaisara Tiberia i wasawasa borimai hesaudoudoi-haligigina eai, Ponotio Pilato Iudea gawanana, eo Heroda Galilaia edi tetaraki, eo ena

tau Pilipo Ituria edi tetaraki, Terekoniti tehana eai, eo Lisania Abilene edi tetaraki.

² Ana eo Kaiapa isi kohena lailaidi ede, Eaubada ena riba i laoma Ioane Sakaria natuna arinai barabara eai.

³ Ioridana oead i laoma nuabui hebapatisona i lauguguaiei, baaea ribagigirina ede:

⁴ Doha Isaia peroveta ena riba bukana eai se uriyao, si ene,

“Arina esau barabara eai i eogayogai, i ene, Guiau ena eda au abinonohai, ena dobila au hedudurai.

⁵ Arotau gamagaridi abo se hemonaudi, oea deba pogadi eo oea tupidi gamagaridi abo se torehebigadi,

dobila gewagewadi abo se heduduraidi, eo dobila tupitupidi abo se hebaubaudi;

⁶ buluma gamagaridi Eaubada ena abihemaui abo se ita.”

⁷ Moutuadi se laoma bena i hebapatisoidi i heribadi, i ene, “Mota nanatuidiyao e, eai i ribahesanapuemi baaea lilai ne au dagogabaei?

⁸ Nuabui aniodi au hemasarahadi, tabu emi nuatu au ene, Tamamai ede Aberahama: ea heribamiu, ea 'ne, Eaubada abina i atao bena teina we'u ta aridi eai Aberahama nanatunayao i hetorodi.

⁹ Huia ta ilama se toreyao oegi lamdi eai, oegi gamagaridi aiadi lolodi nige se toredi abo se oiheguridi, se gabalaedi oegi alaalasi boeana eai.”

¹⁰ Tatao ia se oimurini, si ene, “Saha abo ai abi?”

¹¹ Arinadi i heuio i ribalau aridi eai, i ene, “Ia pereue labui i abidi abo i mosei tau nige enana arinai; eo ia aiai i abi, ena abi hinage doha ede.”

¹² Takisi tautano hinage abo se laoma bena se hebapatisoidi, se ribalau ia arinai, si ene, “Tanu-agamai e, ai saha abo ai abi?”

¹³ Ie ribalau aridi eai, i ene, “Gogo maisana duduraina mo au tanoi.”

¹⁴ Tauiala tataodi hinage ia se oimurini, si ene, “Ai hinage saha abo ai abi?” I ribalau aridi eai, i ene, “Tabu tau esau au hematausi, tabu esau au hegirugaibui, emi paisoa maisana au abi nuamiu * sabusabuaina.”

¹⁵ Tatao nuadi se ponopono, Ioane arinai edi nuatu si ene, ia Keriso e nige’e?

¹⁶ Arinai Ioane gamagaridi arinadi i heuioidi, i ene, “Mamohoi, eau goila eai ea hebapatisoimiu, na esau abo i laoma i saetawatawaigu, ia aena umna mainana nige ea lolo bena ea eaiyairihai; ia Earua Tabuna arinai abo i hebapatisoimiu, eo ma alaalasina.

¹⁷ Ena tapitapi nimana eai, ena † sitona ena abatapitapi matuna abo i tapitapikomakomani, sitona aiaini abo i tanogogoidi ie toredi ena sanara eai; wenudi wa abo i gabudi oeari alaalasina eai nige nosina.”

¹⁸ Eo riba headi gamagamagari ena gugua eai tatao i lauguguaedi.

¹⁹ Na ia Heroda tetaraki i ribasuui, paana Herodia, ena tau Pilipo monena, ie hai, eo paana hinage Heroda baaea gamagamagari i abidi.

²⁰ Baaea lailai esau abo i hepatulaei, ede Ioane numa masigiri eai i tutugudui.

²¹ Tatao gamagaridi se hebapatisoidio, Iesu hinage se hebapatisoi, na ia ma-urana, galewa abo

* **3:14:** au nuataru. † **3:17:** wheat

i taigari.

²² Earua Tabuna i taru dobima ia potana eai ana ao doha bunebune, arina esau galewa eai i laoma, i ene, “Oa Natuyogoyogoigu; u henu-alolo-aririegu.”

²³ Iesu ena borimai tau-esega-i-mate-saudoudoi ana paisoa abo i hetubu, (si ene) ia Iosepa natuna, Iosepa wa Heli natuna,

²⁴ Heli Matata natuna, Matata Levi natuna, Levi Meleki natuna, Meleki Ianai natuna, Ianai Iosepa natuna,

²⁵ Iosepa Matatia natuna, Matatia Amosa natuna, Amosa Nahuma natuna, Nahuma Eseli natuna, Eseli Nagai natuna,

²⁶ Nagai Maata natuna, Maata Matatia natuna, Matatia Semeina natuna, Semeina Ioseka natuna, Ioseka Ioda natuna,

²⁷ Ioda Ioanana natuna, Ioanana Resa natuna, Resa Serubabela natuna, Serubabela Salatiela natuna, Salatiela Neri natuna.

²⁸ Neri Meleki natuna, Meleki Edi natuna, Edi Kosama natuna, Kosama Elemadama natuna, Elemadama Era natuna.

²⁹ Era Iesu natuna, Iesu Eliesera natuna, Eliesera Iorima natuna, Iorima Matata natuna, Matata Levi natuna.

³⁰ Levi Simeona natuna, Simeona Iuda natuna, Iuda Iosepa natuna, Iosepa Ionama natuna, Ionama Eliakima natuna,

³¹ Eliakma Melea natuna, Melea Mena natuna, Mena Matata natuna, Matata Natana natuna, Natana Davida natuna,

³² Davida Iese natuna, Iese Obeda natuna, Obeda Boasa natuna, Boasa Salomona natuna, Salomona Nahasona natuna,

³³ Nahasona Aminadaba natuna, Aminadaba Areni natuna, Areni Hesperoma natuna, Hesperoma Paresa natuna, Paresa Iuda natuna,

³⁴ Iuda Iakobo natuna, Iakobo Isaako natuna, Isaako Aberahama natuna, Aberahama Tera natuna, Tera Nahora natuna,

³⁵ Nahora Seruga natuna, Seruga Reu natuna, Reu Pelega natuna, Pelega Ebera natuna, Ebera Sala natuna.

³⁶ Sala Kainana natuna, Kainana Arepakasa natuna, Arepakasa Sema natuna, Sema Noa natuna, Noa Lameka natuna,

³⁷ Lameka Metusela natuna, Metusela Enoka natuna, Enoka Iareda natuna, Iareda Malaleela natuna, Malaleela Kainana natuna.

³⁸ Kainana Enosa natuna, Enosa Seta natuna, Seta Adamu natuna, Adamu Eaubada natuna.

4

¹ Iesu, Earua Tabuna i monau Ioridano eai i uioma, Earua ia i woelaei barabara eai.

² Asubena tatao-labui-si-mate diabololo ia i nohoi. Nei asubenana ne ia nige i ai: asubena wa se ohi, abo i guriam.

³ Diabololo i ribalau ia arinai, i ene, “Ena oa Eaubada Natuna, we’u ta u lauhesom abo i hemala falawa.”

⁴ Iesu arinana i heuio, i ene, “Se uriyao meta si ene, ‘Areto mo taba nige tau i mauriei, Eaubada ena riba gamagaridi eai hinage’.”

⁵ Diabololo ia i woelai oea deba pogana eai, ma esega tanoubu basileia gamagaridi ia i heitadi.

⁶ Diabololo i ribalau ia arinai, i ene, “Teina gigi-bori ta abo ea lediwaheohidi, ma tepodi hinage,

paana se ledimao arigu eai, taba ea 'ne ea mosedi abo ea mosedi.

⁷Ena u tabaohuiguma, gamagaridi abo enam.”

⁸Iesu arinana i heuio, i ribalau ia arinai, i ene, “Satani e, u lausuara murigu eai: si uriyao, si ene, ‘Guiiau em Eaubada, taba u aihelahui ede iabom mo taba u heaeaiei ede.’ ”

⁹Ia abo i woetasae Ierusalem eai, dubu lailai isu saesaena eai ie tore, i ribalau ia arinai, i ene, “Ena oa Eaubada Natuna ede, hage u gabadobem:

¹⁰doha se uriyao, si ene, ‘Ena aneru abo i het-oro di se itawataikomakomanim:

¹¹isi nimadi eai abo se abiisinim, ata aem u hetupanei we’u eai.’ ”

¹²Iesu arinana i heuio i ribalau ia arinai, i ene, “Si ene, ‘Guiiau em Eaubada tabu u nohoi.’ ”

¹³Diabolo ena noho gamagamagari se ohi, i lausuara i lau e huia esau.

¹⁴Iesu Earua Tabuna ena gigibori debana eai i uio Galilaila eai; ia wasana i lau eanua gamagamagari i hetaiiridi.

¹⁵Edi sunago gamagamagari alodi eai i lauheaetaedi, tatao gamagaridi ia se hedebasaei.

¹⁶Ia abo ie lage Nasareta eai, eanua wa ia abaabihelaina: ia kamanina, asubena Sabati eai i awasae sunago alona eai, i totoro bena buka i hasiri.

¹⁷Isaia peroveta ena buka se mosei ia arinai, Buka wa ie ala, abauriurina wa i lobai si uri ina doha.

¹⁸“Guiiau ena Earua Tabuna eau potagu eai, paana i heyausigu gogogesagesa tataodi wasa lolona abo ea lauguguiaidi; i hetamarigu taunuanuadubu abo se henuabigadi, tatao

auaudi lebohahi ribana abo se lauguguiaidi, tatao matagibugibu matadi abo se helaladi, isi se hebaaeadi abo se eairigabaedi.

¹⁹ Guiau ena huia lolona ina abo ea lauguguiaei.”

²⁰ Buka wa abo i heapu, abo i moseuioi sunago tautawataina arinai, abo i bawabigabiga. Tatao gamagamagari sunago alona eai se itaitagogolau ia arinai.

²¹ Riba wa i ribahetubu aridi eai, i ene, “Ina asubena ta teina uriuri ta beamiu eai se hemamo-hoiei.”

²² Gamagaridi ia se riba helolo eo riba amna wa ia awana eai se laoma se noonooedi. Eo si ene, “Teina ta Iosepa natuna, e nige’e?”

²³ Ie ribalau aridi eai, i ene, “Mamohoi teina riba sonoga abo au ribalaoma arigu eai abo au ene, ‘Doketa e, u hemauiuiioim: hari laulau eo hari laulau wasadi ai ataiedi Kaperenauma eai u ginauridi, em eanua mamohoi eai ta abo hinage u ginauridi.’ ”

²⁴ I ene, “Mamohoi, ea heribamiu ta, nige peroveta esau ena eanua mamohoi eai se hemataei.

²⁵ Riba mamohoina ea heribamiu ta, Elia ena huia eai wabu gamagaridi Isaraela eai se mia, galewa se gudu wa borimai haiona eo nawalai haligigi-esega, eanua gamagamagari guriam lailai se hearo;

²⁶ Elia nige se hetamari aridi eai, i lau mo Sarepeta, Sidona eai, sine esau arinai, sine wa ie wabu.

²⁷ Hinage Elisaia peroveta huiana eai, lepera tataodi gamagaridi Isaraela eai se mia, nige esau se heaa. Naamana Suria tauna iabom.”

28 Isi gamagaridi sunago alona eai, teina ginauri ta se ataiedi, abo se ouyalayala ariri.

29 Se torohai, se abilau ia arinai se heduhedua-halai eanua murimurina eai, abo se woasaei edi eanua oea tupina eai, ia bena se hedonapiledobei.

30 Isi boeadi eai i sapurihai, i lauo ena dobila eai.

31 I dobima Kaperenauma, Galilaia eanuana esau, asubena sabate gamagamagari i lauheataedi.

32 Ena lauheata wa se noonoei: paana ena riba ma gigiborina.

33 Tau sunago alona eai, earua biibiina ie lui, i eabayaba arinana lailai.

34 I ene, “Taiede tabu u laoma arimai eai; oa Iesu Nasareta abo ai sahim? U laoma bena u unuimai wa? Ea itam’o; oa Eaubada ena Tau Tabuna.”

35 Iesu ia i ribasuui, i ene, “U monou me, u lulage murimuri eai.” Diabolo tau wa i heguri boeadi eai, ia abo i lulage murimuri eai, tau wa nige i hebaaea.

36 Isi gamagamagaridi se noonoo, se heuheun-aboisaha, si ene, “Riba sahasaha ina? Ma gigiborina earua biibiidi i lauhesomdi, abo se lulage murimuri eai.”

37 Ia wasana lailai i lau dimo gamagaridi oea wa se tauhetaiiri.

38 Sunago i laugabaei, i awasae Simona ena numa alona eai. Simona bosiana i asiebo, i gigibori ariri: enana se aibodalau ia arinai.

39 I totoro sine wa gegesina eai, gigibori wa i ribagigiri; abo i lautom; ma esega sine wa i torohai i heaeaiedi.

40 Na mahana bena i duidobi mo, isi hari iwala gamagaridi se woaidima ia arinai; ia nimana i

toresae gamagaridi potadi eai, i hemaauridi.

⁴¹ Gamagaridi diabolose luidi se lulage murimuri eai, se eabayaba, si ene, “Oa Keriso ede, Eaubada Natuna.” Ia i ribagigiridi, i ene tabu se ribaribaei; paana ede se nuatuiyao ia Keriso.

⁴² Mara-ie-tom i laugabaedi i lau maratupama eai, tatao ia se eooi, se lage ia arinai, ia se gudugudui, ia nige i laugabaedi.

⁴³ I ribalau aridi eai i ene, “Ea lau eanua headi aridi eai hinage, Eaubada ena basileia ribana ea lauguguiadi: arinai ede se hetamariguma ta.”

⁴⁴ Galilaia sunago alodi eai i lau-gugua.

5

¹ Genesareta gabogabona hasarina eai i totoro, tatao ia se hetauihiihi, bena Eaubada arinana se ataiei.

² Waga labui nei eai i itadi se loidi gabogabo hasarina eai: tauyamayama se laugabaei, edi hiana se gusegusedi.

³ I gerusae waga esau eai, Simona enana, i ai-bodalau ia arinai bena begana i ewalahesigidobei. Abo i bawabigabiga, waga eai tatao i lauheatadi.

⁴ I ribaribalautom, abo i ribalau Simona arinai, i ene, “U dobi gabotum eai, hiana u galaedi u eama.”

⁵ Simona arinana i heuio i ribalau ia arinai i ene, “Tanuagagu e, boni ai eama maratomi, ai hesabaasa ai boau: taiede na oa u riba wa abo hiana ea galaei.”

⁶ Se galaeyao, eama gamagamagari se heonadi: edi hiana se heaipurisi, arinai

⁷ adi sasaguyao hari waga eai wa se nimaoidi, bena se laoma se saguidi. Isi se laoma waga labui wa se usahasahesariridi.

⁸ Simona Petero ie ita, i guridobi Iesu turina gegesina eai, i ene, “U laugabaegu; Guiau e, eau tau baaea.”

⁹ Paana ia, eo isi gamagaridi maenayao eama se hai wa, se noonooei:

¹⁰ Iamesi, eo Ioane, Sebedaio nanatunayao, Simona ana sasaguyao, hinage se noonooei. Iesu abo i ribalau Simona arinai, i ene, “Tabu u matausi; maraitom asubena tatao abo u aiaitoa.”

¹¹ Edi waga se herisaedi, edi ginauri gamagamagari abo se laugabaedi ia se hemuriwatai.

Iesu lepera tauna esau i hemaui

Mt. 8.2-4; Mk. 1.40-44

¹² Ia eanua esau eai, tau esau tauna maudoina lepera i laugirihai, ia Iesu ie ita i gurisalaoba matana eai, i aibodalau ia arinai, i ene, “Guiiau e, ena u henua abo u heaagu.”

¹³ Iesu nimana i helelelaei, i abiita, i ene, “Ea henua: abo u aa.” Ma esega abo tau wa ana lepera i lautom.

¹⁴ Iesu tau wa i lauhesom, i ene, “Tabu u wasawasaei tau esau arinai, se heaam wa arinai u lau mo Kohena arinai, doha Mose i ribaei abo u mosei, ina laulau ta u hemasaraha aridi eai.”

¹⁵ Taiede, ia wasana lailai ie tubugorigori, moutuadi lailai se tupagogoma ia arinai bena se ataiei, eo edi asiebo bena i hemauidi.

¹⁶ Na ia i lausuara barbara eai, i lauuura.

Tau esau i palisi se hemaui

Mt. 9.2-8; Mk. 2.1-12

17 Asubena esau eai, i heaheatadi, Parisea eo tausonoga tataodi headi se babawa ia gegesina eai, eanua gamagamagari Galilaia eai, eo Iudea eai, eo Ierusalema hinage aridi eai se laoma: Guiau ena gigibori eai arinai i hemaauridi.

18 Tatao headi tau esau i palisi ma hatahatana se baheiyama: bena se heawasae, se tore Iesu matana eai, dobila se eooi.

19 Bena se heawasae moutuana se guduguidi dobila se eooasa, arinai se awasae numa dagelana eai, atohi se soelapai abo se hedawedobei boeadi eai Iesu nuanuana eai.

20 Edi sunuma wa ie ita, i ribalau ia arinai, i ene, “Tau e, em baaea se ribagigiridio.”

21 Tauuriuri eo Parisea abo se heunaboisaha, si ene, “Ina eai Eaubada i arina baaeai? Eai baaea ribagigiridi abina i ata na Eaubada iabom mo?”

22 Iesu edi nuatu i nuatulobaidio, edi nuatu i heuio i ribalau aridi eai, i ene, “Aue saha au heuheunaboisaha nuamiu eai?”

23 Aitea i masamasaraha ede, ea 'ne, ‘Em baaea se ribagigiridio,’ e ea 'ne, ‘U toro u laulau?’

24 Na bena abo au ita Tau Natuna tanoubu eai ta ia gigiborina eai baaea i ribagigiridi, (arinai asiebo palisi tauabina i heriba, i ene,) ‘ea heribam ta, u toro, em eba u launou, u lau em numa eai.’ ”

25 Ma esega abo matadi eai i torohai, ena abaeno i abiisini, i laugabaedi i lau ena numa eai, Eaubada i hedebasae.

26 Isi gamagaridi se noonoei eo Eaubada se hedebasae, se matausi dumaduma, si ene, “Gin-auri sahasahadi wau ta ta itadi?”

Mataio se eogai
Mt. 9.9; Mk. 2.13-14

²⁷ Ginauri wa muridi eai abo ie lau, takisi tau-tano esana Levi ie ita, numa telona eai ie bawa: i ribalau ia arinai, i ene, “U hemuriwataiguma.”

²⁸ Ia abo i torohai, ginauri gamagaridi i laugabaedi, ia murina eai ie lau.

²⁹ Levi mataasi lailai ie abi ena numa eai Iesu ana: telona tataodi eo hari tatao, peledi lailai maedi se bawabigabigaesega.

Iesu tauuriuri eo Parisea tataodi edi riba i heuiodi

Mt. 9.10-17; Mk. 2.16-22

³⁰ Edi tauuriuri eo Parisea ena heaheatayao se gadigadiguguedi, si ene, “Aue saha maemiu telona tataodi eo tatao baabaeadi au aiaiesega, eo au nomnomesega?”

³¹ Iesu arinadi i heuio, i ribalau aridi eai, i ene, “Tauadiadidiri doketa nige se eogai: isi tauasi-asiebo mo.

³² Nige ea laoma tatao laulaududurai ea eogaidi, tatao baabaeadi mo, bena nuadi, se buidi.”

³³ Se ribalau ia arinai, si ene, “Paana saha Ioane ena heaheatayao huia gamagari se aiaiu, eo se lauuura, Parisea edi heaheatayao hinage doha, na oa em heaheatayao se aiai eo se nomnom?”

³⁴ Iesu i ribalau aridi eai, i ene, “Tautawasora harihariu ena heriheriam abo se aiudi wa, tautawasora sora maedi se mia esega?”

³⁵ Huiadi abo se lagema tautawasora harihariu abo se lahesuara, abo se aiudi, nei huiadi eai ne.”

Parabole labui: lulu eo ile ribadi

Mt. 9.16-17; Mk. 2.21-22

³⁶ Arinai abo parabole esau i heribadi, i ene, “Nige tau esau lulu harihariuna tupona i abi i

popoi lulu beabeana arinai; ata harihariuna wa esau i aipurisi, eo tupona wa, lulu harihariuna eai se abi, nige i patu komakomani lulu beabeana arinai.

³⁷ Hinage nige tau esau waina harihariuna i leduauri ile beabeadu alodi eai; ata ile wa abo se pawa, waina abo i boriri, ile wa taba se baaea.

³⁸ Waina harihariuna taba se ledu ile harihari-udi alodi eai; abo se loloesegaidi.

³⁹ Hinage nige tau esau waina beabeana i nom abo ma esega waina harihariuna i gadosisie; paana i ene, ‘Beabeana mo i lolo.’ ”

6

Iesu eo sabate ribana *Mt. 12.1-8; Mk. 2.23-28*

¹ Sabate bagubagunana ie ohi, e, sabate helabuina eai, Iesu i lulau * sitona oeadu eai, ena heaheatayao sitona se worahaidi, nimadi eai se wosadi, abo se aidi.

² Parisea headu se ribalau aridi eai, si ene, “Aue saha sabate asubenadi eai laugagaeo au utusidi?”

³ Iesu arinadi i heuio, i ene, “Davida ena laulau buka eai nige au hasiri wa, ia i guriam wa, eo ana sasaguyao hinage;

⁴ Eaubada ena numa eai i awasae, areto tabuna ie abi ie ai, tupona hinage i mosei ana sasaguyao aridi eai; kohena tataodi isibom mo tauaiadi ede?”

⁵ I ribalau aridi eai, i ene, “Tau Natuna ia sabate Tanuagana hinage.”

* **6:1:** wheat.

Tau esau nimana i tubu eaeyaelua

Mt. 12.9-14; Mk. 3.1-6

⁶ Na, sabate esau i awasae sunago alona eai i lauheata: tau esau nei eai ia nima tutuna i tubu eaeyaelua.

⁷ Tauuriuri eo Parisea ia se itaitasipoi, asubena sabate tau wa abo i hemaui, e nige'e; ana mata se eooi bena ia abo se hegiu.

⁸ Edi nuatu i itayao, tau wa nimana i eaeyaelua i ribalau ia arinai, i ene, "U toro, u toromasarahama duaduari eai." I toro, abo i toromasaraha.

⁹ Iesu i ribalau aridi eai, i ene, "Ginauri esega ea oimuri arimiu eai, laugagaedoha emi laelaena asubena sabate, laulau lolo ta ginauri, e laulau baaea? ta abihemaui, e ta unuhemate?"

¹⁰ Gamagaridi i itaitahetahetairidi, abo i ribalau tau wa arinai, i ene, "Nimam u heleleama." Nimana i helelelaei: nimana abo i mauriuio doha nimana esau.

¹¹ Adi ou se monauboriboriri; isibom se ribariba, si ene, Iesu abo edoha edi abiabina.

Tatao saudoudoi se hineridi

Mt. 10.2-4; Mk. 3.13-19

¹² Nei asubenadi ne ia i dalasae oea tupina eai i lau uura, maiona esau maudoudoina eai i lau uura Eaubada arinai.

¹³ Mara-ie-tom ena heaheatayao i eogaidima, aridi eai saudoudoi-labui i riba-hilehileidi; isi esadi hinage i toredi ede aposotolo;

¹⁴ Simona. (esana esau ie tore ede Petero,) eo ena tau Anederea, Iamesi eo Ioane, Pilipo eo Batolomaio.

¹⁵ Mataio eo Toma, Iamesi Alepaio natuna, eo Simona esana hinage Selote.

¹⁶ eo Iudasi, Iamesi ena tau, eo Iudasi Isakariota, ia taumoruina ede.

¹⁷ Maedi i leta i dobi, gonu eai i totoro, eo ena heaheatayao peledi hinage, eo moutuadi lailai Iudea eo Ieruselema eai se laoma, eo Turo eo Sidona geregeredi eai se laoma hinage, ena riba bena se ataiei, eo adi asiebo hinage bena i hemaauridi;

¹⁸ isi hinage earua biibiidi se hebaaeadi; abo se hemaauridi.

¹⁹ Moutuadi gamagaridi ia bena se abiitalaei; gigibori ia boeana eai i laoma, arinai gamagaridi i hemaauridi.

²⁰ Matana i lau-laei ena heaheatayao aridi eai, i ene, “Omi gogogesagesa tataomiu e, au nuawoiwoina: Eaubada ena basileia omi enamiu.

²¹ “Omi huia ta au guriam au nuawoiwoina: paana bogamiu abo se sese. Omi huia ta au doudou au nuawoiwoina: abo au marumaruhi.

²² “Tatao ena se ouyalayalaemiu, eo se lau-suaraemiu, eo se alaliuliuaemiu, eo esamiu se awagabaei doha ginauri baabaeae, Tau Natuna debana eai, omi abo au nuawoiwoina.

²³ Nei asubenana ne abo au kode, au kode lamposi: emi ainauia galewa eai abo ie lai: tamadiyao edi laulau doha ede peroveta aridi eai.

²⁴ “Ahani omi monamonaune tataomiu e! paana emi henuhenu au abiyao.

²⁵ “Ahani omi bogamiu se seseo! omi abo au guriam. Ahani omi huia ta au marumaruhi! abo au nuadubu eo au dou.

²⁶ “Ahani omi, tatao gamagaridi se riba helolomiu! paana doha ede hinage tamadiyao edi laulau peroveta borabora aridi eai.

27 “Omi arinagu tauataiena arimiu eai ea ene, Ami waiunu au gadosisiedi, isi se ouyalayalaemiu adi gigi au hebigadi.

28 Isi se arina baaeamiu au taubigaidi, isi hinage se hebaaeaimiu au lau uura enadi.

29 Ena tau esau paream ie wai, paream esau u mosei hinage; ia em lulu i girihai em pereue tabu u nuahi.

30 Tatao gamagaridi em ginauri se aibodaidi u mosedi: ia hinage em gogo i girihaidi tabu u abiuioidi.

31 Laulau aisana u henua tatao se abi arim eai, meta doha hinage u abi isi aridi eai.

32 “Ena isi taugadosisiem mo u gadosisiedi, em lolo saha? Tatao baaea taugadosisiedi hinage se gadosisiedi.

33 Eo ena isi tauhelolomiu au helolodi hinage, emi lolo saha? Tatao baabaaeadi edi laulau hinage doha meta.

34 Ena ginauri au mosei, maisana bena se leawa, emi lolo saha? Tatao baaea ma heledi tatao baaea enadi se mosedi maisana gonogonoana bena abo se abi.

35 Omi ami waiunu au gadosisiedi, eo iilamiu se lolo, eo au mosei tabu maisana au nuatui, emi ainuia abo i lai, omi abo Saesaeairina nanatunayao eai au lau, paana tatao ia nige se nuatui i abiheloloedi, eo baaea tataodi hinage.

36 Abo tatao au nuatoatoaidi, doha hinage Tamamiu i nuatoatoaidi.

37 “Tabu au hekihekirainodi, abo nige se hekirainomiu: tabu au hebaaeadi, abo nige se hebaaeamiu: au ribagigiridi, abo se ribagigirimiu:

38 au mosei, abo hinage se lediwa arimiu eai; abanonoi abo se hemonau, se abitawai, se heluilui, se heboribori, tatao abo se tore nuapoumiu eai. Paana nonoi au nonoiei wa abo hinage se nonoieawa arimiu eai.”

39 Parabole esau i heribadi ede, i ene, “Taumatagibugibu abina i ata helena taumatagibugibu abo i woalaei? Abo se beu labulabui saga eai, e nige’e?

40 Tauheata ana tanuaga nige i saetawatawai: heaheata se heatakomakomaniyao ia abo doha ana tanuaga.

41 Ue saha muari u ita em tau matana eai, eo oeagi oa matam eai nige u nuatui?

42 Hinage edoha em ribariba em tau arinai, u ene, ‘Egu tau e, muari oa matam eai sora bena ea abihai,’ oeagi oa matam alona eai ie ota nige u ita. Oa tauboraborasom, oeagi matam boeana eai u abihai bagunai, arinai abo u itaitalolo muari em tau matana eai abo u abihai.

43 “Paana oeagi lolona uaua baaeana nige i uaedi: hinage oeagi baaeana uaua lolona nige i uaedi.

44 Hari oeagi, hari oeagi uauadi aridi eai ta italobaidi. Tatao lagau nurinurina eai kuhou nige se gigidi, hinage popohauhau eai vine nige se gigidi.

45 Tau lolona ginauri lolodi nuaboeana eai i toredi abo ginauri lolona i lahahaidi, eo tau baaeana hinage ginauri baaea nuaboeana eai i toredi abo ginauri baaea i lahahaidi: nuaboeana ena monau boriboriri arinai awana eai i ribaribaei.

⁴⁶ “Aue saha esagu au ataatai, au ene, ‘Guiiau e, Guiiau e’ na egu riba nige au lauwataidi?”

Parabole: tau esau ena numa i abi we’u-tau potana eai

Mt. 7.24-27

⁴⁷ “Taba tau esa tau esa i laoma arigu eai, egu riba i ataiedi, eo i abiwataidi hinage, ana ao abo ea heitamiu:

⁴⁸ ia doha tau esau i abi-numa, i sarahesigidobei, numa paana abo i tarini we’u-tau potana eai: abaita ie siu, abaita numa wa i utuhai, to nige i moimoiu, paana we’u-tau potana eai se hetoro.

⁴⁹ Ia riba wa i ataiedi, nige i abiwataidi, doha tau esau tano potana eai i abi-numa, nige paana; abaita numa wa i utuhai, ma esega abo ie guri, numa wa i tatagorigori.”

7

Senturion ena heaheari se hemaui

Mt. 8.5-13

¹ Ena riba gamagaridi tatao matadi eai i ribalautom, abo i lagema Kaperenauma eai.

² Senturion esau ena gadosisi heahearina i asiebo, matena i hanahanau.

³ Ia Iesu wasana i ataiei, Iudea edi babada i hetamaridi Iesu arinai, i ribagadogadora ia arinai, ia bena i laoma ena heaheari i hemaui.

⁴ Isi se lagema Iesu arinai, se ribagadogadora, si ene, “Tau lolona nei, bena u sagui:

⁵ paana eda basileia i gadosisie, eo eda sunago esau i hetoro.”

⁶ Iesu maedi se lau. I lagema numa hana-hanauna eai, senturion ia ehanayao headi i hetamaridi Iesu arinai, se ribalau ia arinai, si ene, “Guiiau e, tabu ea hegadotoam: eau nige ea lolo abo u awasaema egu numa alona eai:

⁷ arinai hinage ea 'ne nige ea lolo bena ea laowa arim eai. Riba mo u ribaei, egu heaheari abo i mauri.

⁸ Paana eau tanuaga esau ena heaheari: egu iala heahearidi hinage se awatanuagaegu, esau ea heriba i lau, abo i lau; esau ea heriba i laoma, hinage abo i laoma; egu heaheari ea heriba, ea 'ne, “Teina ta u abi,’ abo i abi.”

⁹ Teina riba ta Iesu i ataiedi, tau wa i nooei, i torobui, tatao wa ia se hemuriwatai i heribadi, i ene, “Ea heribamiu ta, nige sunuma lailai esau ea lobai doha ina, Isaraela aridi eai nige'e.”

¹⁰ Isi se hetamaridi wa se uio numa eai, tau asiebo wa se lobai i lolo'o.

Sine wabu natuna se hetorouioi.

¹¹ Mara-ie-tom i lage eanua esau esana ede Naina; ena heaheatayao gamagaridi ia maena se lau, eo moutuana hinage.

¹² Eanua tonana guduna se hanahanau, sinare esau se bahei murimuri eai ia sinana natue-seesegana, sine wa hinage ie wabu; eanua tataodi gamagaridi ia se hesaguei.

¹³ Guiiau sine wa i ita, ia i nuatoatoai, i heriba, i ene, “Tabu u dou.”

¹⁴ Iesu i laoma sinare aba-baheina i abiitalaei: taubahena se tarutoro. Ia abo i ene, “Hewari e, ea heribam ta, u toro.”

¹⁵ Taumate wa abo i bawabigabiga, ia abo arinana ie tore, i ribariba. Iesu abo i mosei sinana arinai.

¹⁶ Isi gamagaridi se matausi, Eaubada se hede-basaei, si ene, “Peroveta lailai ita boeada eai ie tubu,” eo si ene “Eaubada ena tataoyao i aitaumanaidi.”

¹⁷ Arinai abo wasana lailai i lau Iudea oead gamagaridi eai, eo i lau eanua gamagamagaridi i hetaiiridi.

¹⁸ Ioane ena heaheatayao teina ginauri gamagaridi ta ia se heriba.

Ioane Bapatiso ena heaheatayao i hetamaridi se hesiolau Iesu arinai

Mt. 11.2-6

¹⁹ Ioane ena heaheata labui i eogaidi, abo i hetamaridi Iesu arinai, i ene, “Ia se ribaei bena i laoma wa ia ede oa? e hari tau abo ai nuatuwatai?”

²⁰ Taudi labui wa se lagema ia arinai, si ene, “Ioane Bapatiso i hetamarimai arim eai, i ene, ‘Ia se ribaei bena i laoma wa ia ede oa, e hari tau abo ai nuatuwatai?’ ”

²¹ Nei asubenana ne gamagaridi se aiiwala, eo se asiebo, eo earua baaea se luidi, i hemaauridi; eo taumatagibugibu gamagaridi matadi i helaladi.

²² Iesu arinadi i heuioidi, i ene, “Taiede au lau, ginauri au itadi eo au ataiedi Ioane au heriba, ia ede taumatagibugibu matadi se lala, taulaulau-dae se lautoditodi, lepera se uruosi, taubeadoodoo se ataiei, taumatemate se toro, tatao gogogesagesa aridi eai evanelia se lauguguaiei.

²³ Taba tau esa eo esa nige i nuabaaea arigu eai, nuana abo i woiwoina.”

*Iesu Ioane Bapatiso ribana i heribadi**Mt. 11.7-15*

²⁴ Ioane ena riba taulaena se lauo, abo Iesu Ioane ribana tatao aridi eai i ribahetubu, i ene, “Aue lau barabara eai wa saha bena au ita? Didiari mana i iuhiheeo wa?”

²⁵ Aue lau nei eai saha bena au ita? Tau esau ana lulu bigabigana ie lui? Isi lulu paspasadi tauluidi, eo aiai lolodi tauaidi se bawa wasawasa edi numa eai.

²⁶ Aue lau nei eai saha bena au ita? Peroveta wa? E, ea heribamiu ta, ea 'ne, ia peroveta gamagamagari i saetawatawai.

²⁷ Ia ede ia, se uriyao, si ene, ‘Egu tauwasa ea hetamarimugaiem, em eda abo i sepanonohai.’

²⁸ Ea heribamiu ta, ea 'ne, tatao sisine se labasidi wa aridi eai Ioane Bapatiso mo peroveta saesaena; taiede Eaubada ena basileia eai tau gagiri aririna ia Ioane i saetawatawai.”

²⁹ Tatao gamagaridi ia se ataiei, eo takisi tautano tataodi hinage, Eaubada se awamamohoiei, paana isi Ioane ena bapatiso eai se hebapatisoidi wa.

³⁰ Parisea tataodi eo laugagaeo tauheatana tataodi isi nuaboeadi eai Eaubada ena riba se tauotaotaei, paana Ioane ena bapatiso nige se abi.

³¹ I ene, “Teina isi ta tataodi saha arinai ta heaheasoniedi? Isi doha abo aisana mo?”

³² Isi doha ede merumeru se bawagogo abauneune eai, se haihaieogaidi, si ene, ‘Huelele aie iuhiawa arimiu eai na nige aue saga: aie dou nuanuadubuemi, na nige au doudou.’

³³ Na Ioane Bapatiso i laoma aiai nige i aidi eo waina nige ie nom: omi au ene, ‘Diabolo esau ia boeana eai.’

34 Tau Natuna i laoma aiai i aidi, eo waina ie nom, omi au ene, “Tauaiaisom, eo waina taunom-nomsom, takisi tataodi eo tatao baabaaeadi edi heriam!’

35 Sonoga nanatunayao gamagaridi aridi eai, sonoga wa abo se hemamohoiei.”

Iesu, Parisea tauna ena numa eai.

36 Parisea tauna esau i henua bena Iesu maena se aiaiesega. Ia i awasae Parisea tauna ena numa eai, i bawabigabiga se aiai.

37 Eanua sinena esau, sine baaeana, wasana i ataiei Iesu Parisea tauna ena numa eai i bawabigabiga i aiai, * nado, alabata ilena eai, ie abi leama.

38 Ia murina eai aena eai i totoro i doudou, ia aena matasulu eai i deuridi, eo uru maiawadi eai i saudi, ia aena i alagoiedi, eo nado wa arinai i heeausidi.

39 Parisea tauna, Iesu i eogai wa, wau wa ie ita, nuaboeana eai i nuatui, i ene. “Tau ta ena ia peroveta, sine ta i abilau ia arinai abo i nuatuloibaiyao: paana ia sine baaeana.”

40 Iesu i heuio ia arinai, i ene, “Simona e, egu riba begana bena ea heribam.” Ia i ene, “Tanuagagu e, u riba.”

Parabole: tatao labui tau esau gogo se abidi sora nige se hemaisa.

41 “Tatao labui tau esau ena gogo se abidi sora nige se hemaisadi: esau ana haga denari handere haligigi, esau denari tatao-labui-si-mate-saudoudoi.

* 7:37: wosawosa, pane lolololona.

⁴² Isi nige edi moni, ia taudi labui adi hagahaga i soegabaedi. U ene edoha, aitea tau wa ia abo i gadosisiaririei?”

⁴³ Simona ia arinana i heuio, i ene, “Nuana ia wa ana haga ie lai wa, na i soegabaei.” I ribalau ia arinai, i ene, “U nuatui i dudurai.”

⁴⁴ Ia abo i sinibui sine wa arinai, eo i ribalau Simona arinai, i ene, “Sine ta u ita? Ea awasaema em numa eai, goila nige u oiyama aegu ana deudeuri: na ia mo matasulu eai aegu i deuridi, eo uru maiawadi eai i saudi.

⁴⁵ Oa nige u alagoiegu: teina sine ta egu huia awasaema wa ie tubu aegu i alagoiedi, nige i lautom.

⁴⁶ Urugu eausi eai nige u heeausi: teina sine ta aegu nado eai i heeausidi.

⁴⁷ Arinai ea heribam ta, ea 'ne, ena baaea, se gamagari hinage, se ribagigiridio; paana i gadosisiariri: ia baaea gagiridi mo se ribagigiridi, ena gadosisi hinage gagirina mo.”

⁴⁸ I ribalau sine wa arinai, i ene, “Em baaea se ribagigiridio.”

⁴⁹ Isi ia maenayao se bawabigabiga si aiai edi nuatu, si ene, “Ina eai, baaea hinage i ribagigiridi ta?”

⁵⁰ I ribalau sine wa arinai, i ene, “Em sunuma eai ue mauri; ma nuabigabigam u lau.”

8

Iesu Galilaia eai i laugugua eo i abihemauri.

¹ Abotai, i lau eanua lailaidi eo eanua gagiridi gamagaridi i baeawaidi, i lauguguaedi eo Eaubada ena basileia wasa lolodi i heribadi: saudoudoi-labui maenayao.

² Sisine headi, earua baaedi se luidi eo asi-
asiebodi hinage ia i hemauidio, Maria Magadala,
demoni haligigi-labui ia arinai se lulagegabaei.

³ Eo, Ioana Kusa monena, Heroda ena numa
tauitawataina, maena Susana, eo sisine gama-
garidi hinage, edi ginauri se mosemosedi ia ari-
nai, ia se taubigai.

Parabole: uaua tauhesuruna
Mt. 13.1-23; Mk. 4.1-20

⁴ Hari eanua, hari eanua, tataodi gamagaridi se
tupagogoma ia arinai, parabole esau abo i herib-
adi:

⁵ “Tuma tauhesuhesuruna ie lau sitona tumana
i hesuruauri: ma hesuhesuruna, na headi se beu
eda gegesina eai; aedi eai se ututawatawai,
malagaibu manudi abo se aidi.

⁶ Headi se beu malatetepari eai; abo se ini, se
wowoea, paana ede tano nige ie buta.

⁷ Headi se beu lagau nurinuri boedi eai; maedi
lagau nurinuri se iniesega, se initalawatawai.

⁸ Headi hinage tano lolona eai se beu, se ini,
abo se ua aiaidi tatao-haligigi-se-mate se toredi.”
Teina riba i ribalautom, i eoga, i ene, “Ia beana eai
i ataiei, abo i ataieididini.”

⁹ Ena heaheatayao se oimurilau ia arinai, si ene,
“Teina parabole ta aniona saha?”

¹⁰ Ia i ene, “Omi Eaubada ena basileia riba
eamuyamuidi au nuatuidi: na isi aridi eai mo
parabole se ribaedi; se itaita taba nige se ita, eo se
ataiei taba nige se nuatui.

¹¹ Parabole wa ia ede ina: tuma wa ia ede
Eaubada ena riba.

¹² Isi eda gegesina eai wa, isi ede tauataiena: diabolo abo i laoma, riba wa nuaboeadi eai i abihaidi i laedi, ata se sunumaei eo ata se mauri.

¹³ Isi malatetepari eai wa, isi ede tauataiena, riba wa se abi ma kodedi; isi nige lamdi, huia kuukuu mo se sunumaei, noho se hearo abo se beu.

¹⁴ Isi se beu lagau nurinuri boeadi eai isi ede riba wa tauataiena, abo se lau, teina mauri ta modemodedi eo ginauridi eo abakodedi se tubutawatawai, ai ai lolodi nige se toredi.

¹⁵ Isi tano lolona eai wa, isi ede, ma nualolodi, eo ma nuaduduraidei, riba wa se ataiei, abo se sogohididini, eo ai ai se toredi ma nuapaipaidi.

Parabole: kanela se healasi
Mt. 5.15; Mk. 4.21-23; Lk. 11.33

¹⁶ Taba nige tau esau lamepa i healasi, abo lasi esau arinai i hebuitawai, e i tore abaeno ubuna eai; na lamepa ena aba ota eai wa ie tore, isi se awasaema marana bena se ita.

¹⁷ Riba se ribayamuyamui, abo i masaraha; eo ginauri esau se tautauyamui, abo se wasawasaei, eo se hemasaraha.

¹⁸ Temeta mo au ataiwataikomakomani; paana ia i abi enana abo se mosei; ia hinage nige i abi, enana begana i nuatui bena i abi wa, abo se abiuioi.”

¹⁹ Ia sinana eo ena tataoyao abo se laoma ia arinai, tatao se tauihiihi arinai nige edi aba laoma.

²⁰ Headi ia se heriba, si ene, “Sinam eo em tataoyao murimuri eai se totoro, se henua bena se itam.”

21 Ia arinadi i heuio i ribalau aridi eai, i ene, “Sinagu eo egu tataoyao isi ede Eaubada ena riba se ataiei, eo se abiwatai hinage.”

Iesu wowori i ribahetarudi

Mt. 8.23-27; Mk. 4.36-41

22 Asubena esau eai, i gerasae waga eai ena heaheatayao maenayao: i ribalau aridi eai, i ene, “Ta lau gabogabo hari sana awasi eai.” Isi abo se geru.

23 Ma адауди na ie eno: gabogabo eai mana lailai abo i lagelagei; ma esega abo butubutu se iniinisae waga alona i hemonau, se adau baaea.

24 Arinai abo se lau ia se hanoi, si ene, “Tanu-agamai e, abo ta mate!” Ia abo i toro, mana eo butubutu lailai wa i ribahetarudi: se lautom, abo i daumori.

25 I ribalau aridi eai, i ene, “Emi sunuma wa haedi?” Isi se matausi se noonoei, se heun-aboisaha, si ene, “Tau ta ie saha? mana eo butubutu i lauhesomdi, eo ia se awaabiei?”

Gadara tauna arinai demoni se aiduedi

Mt. 8.28-34; Mk. 5.1-17

26 Isi se duna Gerasene tataodi edi oea eai, Galilaia hari sana awasi eai.

27 Ia i pesao, tau esau eanua eai i laoma se hailobai, huia lohaloha demoni ia se lui, lulu nige i luidi, eo nige ie mia numa alo eai, bousa eai mo i miamia.

28 Ia Iesu ie ita, i eabalailai, matana eai ie guri, i arina lailai, i ene, “Iesu Eaubada Saesaeariri Natuna e, saha abo u abi arigu eai? Ea awanori-laoa tabu u heamamnagu.”

29 (Paana ia earua biibiina i lauhesom tau boeana eai wa i lulagema. Huia gamagari earua

tau wa i toatoai: maina poasi eo poasi adidiri arinai tau wa se auau; maina wa i hetautusidi eo demoni wa ia i henau barabara eai.)

³⁰ Iesu i hesiolau ia arinai, i ene, “Oa esam wa?” Ia i ene, “Legeona”: paana demoni gamagaridi ia boeana eai se lui.

³¹ Isi se awanorilau ia arinai tabu i lauhesomdi se lau gabotum eai.

³² Metai sarai eawoidi lailai oea eai se aibai: se awanori ia arinai bena se lulau isi boeadi eai. Ia abo ie eari.

³³ Demoni wa tau wa abo se pesagabaei, se lulau sarai boeadi eai: eawoidi wa abo se haidagoidi se lau malasarisari eai, se beu gabogabo eai, abo se galamosi.

³⁴ Tauheaidi wau wa se ita, abo se dago, se lau eanua eai eo oea eai se wasaduaiei.

³⁵ Isi abo se pesa se lau se ita; se laoma Iesu arinai, tau wa demoni se laugabaei wa, i bawabi-gabiga Iesu aena gegesina eai, ana lulu i lui, eo nuana i sibasibao: arinai isi se matausi.

³⁶ Headi laulau wa matadi eai se ita se ribaei laulau sahasaha se abiabiei, arinai demoni tauluina se hemaui.

³⁷ Gerasene oead i se hetaiiri tataodi gamagaridi se awanorilau ia arinai bena i laugabaedi; paana isi matausi lailai se hearo: abo i gerusae waga eai, ie uio.

³⁸ Tau wa, demoni se pesagabaei wa, i awanori Iesu arinai bena maena se mia. Iesu mo i hetamari, i ene,

³⁹ “U uio em numa eai, ginauri saesaedi Eaubada i abidi arim eai u hemasarahadi.” I lau ena dobila eai, eanua se ohihai, wau abiabina wa Iesu ie abi ia arinai, i heribadi.

Sine esau ana iwala se helautom, eo Iairo natuna siu se hetorouio.

Mt. 9.18-26; Mk. 5.22-43

⁴⁰ Iesu ie uio, tatao gamagaridi maenayao se hailobai matadi se soasoari: paana gamagaridi ia se nuanuaiei.

⁴¹ Na tau esau i laoma esana Iairo, ia sunago tanuagana esau: i guridobi Iesu aena eai, i awanori ia arinai, bena i laoma ena numa eai.

⁴² Ia natuna siu esega mo, ena borimai saudoudoi-labui, ia ie ota matena i hanahanau.

Ia ma launa tatao ia se lauihiihie.

⁴³ Sine esau asiebo osina ie abi borimai saudoudoi-labui, ena moni gamagari i moseohi doketa aridi eai, nige esau ia i helolo.

⁴⁴ Ia Iesu murina eai i laoma, ana lulu dedeana i abiita: ma esega abo asiebo osina i lautom.

⁴⁵ Iesu i ene, “Eai i abiitaguma?” Gamagaridi se harere, abo Petero ma ana sasaguyao si ene, “Tanuagamai e, moutuana wa se lauihiihiem, eo se heduheduiahalaim, hinage u ene, Eai i abiitaguma?”

⁴⁶ Iesu i ene, “Esau i abiitagu: paana ea nua-tuiyao gigiborigu i leyao.”

⁴⁷ Sine wa ie ita ia nige i tauyamuyamui, i laoma ma tabutabubuna ia matana eai i guridobi, eo tatao gamagaridi matadi eai Iesu ena abiitana paana i riba hemasaraha, eo ma esegana i mauri.

⁴⁸ Ie ribalau ia arinai, i ene, “Natugu e, nuam ie taru: em sunuma eai u mauri; ma nuabigabigam u lau.”

⁴⁹ Ma-ribaribana, esau sunago tanuaga numana eai i laoma ia arinai, i ene, “Natum siu wa ie mateo; Tanuagada tabu u hegadotoa.”

⁵⁰ Iesu i ataiei arinana i heuio, i ene, “Tabu u matausi: u sunumawatai mo ia abo se hemaui.”

⁵¹ Iesu i laoma numa eai, tatao i ribanuahidi tabu esau i awasae, na Petero eo, Iamesi eo, Ioane isibom. eo siu wa tamana eo sinana hinage.

⁵² Gamagaridi se doudou, eo se laulaukapore: ia mo i ene, “Tabu au doudoui: ia nige i mate, ma enona.”

⁵³ Isi ia se marumaruhiei, eo se alaliuliuaei, paana se itayao i matearirio.

⁵⁴ Iesu i aiduiedi, se pesa murimuri eai, siu nimana eai ie abi i eoga, i ene, “Siu e, u toro.”

⁵⁵ Earuana abo ie uioma, ma esega abo i toroma: Iesu i lauhesomdi aiai ana se mosei.

⁵⁶ Ia tamana, sinana, se noonoei: abo i heribadi wau abiabina wa tabu tau esau se heriba.

9

Saudoudoi-labui wa i hetamaridi se laugugua Mt. 10.1-42; Mk. 6.7-14

¹ Ena heaheatayao saudoudoi-labui i eogagogoidima, i heterodi demoni gamagamagari tanuagadi eai se lau, eo gigibori i mosei aridi eai iwala gamagamagari abo hinage se abihemauridi.

² Ia i hetamaridi Eaubada ena basileia se lauguguaei, eo tauasiasiebo se hemaui.

³ Ie ribalau aridi eai, i ene, “Emi lauwasia enana tabu saha au bahei, tabu tue, tabu tobo, tabu aiai, tabu moni; tabu emi pereue au heona labui.

⁴ Ena au awasae hari numa hari numa, metai au mia e emi huia lau.

⁵ Ena headi nige se eogaisinimiu, eanua me emi huia laugabaena, aemi geregeredi au oilului gabaedi adi giru heiheinoina.”

⁶ Isi se lauo, eanua se baeawaidi, evanelia se lauguguaei, eo tatao asiasiebo hari tupo hari tupo se hemauidi.

⁷ Ena laulau gamagamagari Heroda tetaraki wasadi i ataiei: nuana i ponopono, paana headi si ene, Ioane mate eai i torouioma.

⁸ Headi hinage si ene, Elia i lagema; eo headi si ene, peroveta esau mumuga eai wa, i torouio.

⁹ Heroda i ene, “Ioane uruna ea tomhai wa: na ia eai nei laulau ne i ginauridi wasadi ea ataiedi wa?” I henua Iesu bena i ita.

Aposotolo se uioma: tatao tausani haligigi se heaidi

Mt. 14.13-21; Mk. 6.30-44; Io. 6.1-14

¹⁰ Aposotolo tataodi se uioma edi abiabi gamagamagari wa ia abo se heriba. Ia abo i woelaedi, se lausuarayamuyamui edi dobila eanua esau esana Betesaida wa malatupama eai.

¹¹ Tatao se ita, ia abo se hemuriwatai: i oiamidi, Eaubada ena basileia ribadi i heribadi, headi hinage se asiebo abo i hemauidi,

¹² Mahana i taru’eo, saudoudoi-labui se laoma, se ribalau ia arinai, si ene, “Moutuadi wa u hetamaridi bena se lau eanua eo oea se lauhetairi, se eno, eo aiai se eoo, paana ita malatupama eai ta mimia ta.”

¹³ Ia i ribalau aridi eai, i ene, “Aiai adi au mosedi.” Isi si ene, “Ama falawa gagiridi haligigi, eo eama labui mo: taba ai lau tatao gamagamagari ta adi aiai ai uneune.”

14 Paana tatao mo isi tausani haligigi. Ena heaheatayao i heribadi, i ene, “Au hebawabigabigaesegaidi, hari poru, hari poru, tatao-labui-se-mate-saudoudoi.”

15 Ena riba se abiwatai nei doha, gamagaridi se hebawabigabigadi.

16 Ia abo falawa haligigi, eo eama labui i abidi, i itasae galewa eai, i lautoi, abo i ihi, i mosei ena heaheatayao aridi eai, abo se toredi moutuadi wa matadi eai.

17 Isi se aiai, e bogadi se sese: aitoredi se tanogoidi bosa saudoudoi-labui.

Petero Keriso i wasawasaei
Mt. 16.13-20; Mk. 8.27-30

18 Na, ia mo sora ma uurana, ena heaheata maenayao: i hesiolau aridi eai, i ene, “Tatao si ene eau ede eai, wa?”

19 Isi ia arinna se heuio, si ene, “Ioane Bapatiso; headi si ene, Elia; headi hinage si ene, mumuga perovetadi esau i torouioma.”

20 I ribalau aridi eai, i ene, “Na, omi au ene eau ede eai wa?” Petero ia arinana i heuio, i ene, “Eaubada ena Keriso.”

21 Awadi i tawaidi, i lauhesomdi, tabu tau esau wau riba wa se heriba.

Iesu ia matena, eo ia torouiona i ribanonohai
Mt. 16.21; Mk. 8.31

22 I ene, “Tau Natuna amamna gamagamagari abo i hearodi, eo babadadi, eo kohena lailaidi, eo tauuriuri ia abo se laupalihibaei, abo se unuhemate, asubena hehaionana eai abo se heterouioi.”

23 Ia abo i ribalau gamagaridi aridi eai, i ene, “Tau esau ena gadosisi bena i hemuriwataigu,

taba iabom i nuagabaeuioi, asubena gamagama-gari ena satauro i abiisini, eo i hemuriwataigu.

²⁴ Na tau esau, eo esau, ia maurina i nuatuuiioi ia mauri abo ie dabu: tau esau eo esau ia maurina i nuagabaei eau debagu eai, ia mauri abo i abi.

²⁵ Saha lolona abo tau i abi, taba gogo gamagama-gari tanoubu eai ta i abiheohidi, ia maurina abo i gabaei?

²⁶ Tau esau, eo esau, i taumaeamaeaeagu, eo egu riba i taumaeamaeaeadi, tau Natuna ia abo hinage i taumaeamaeaei, ena huia laoma ma namanamarina, eo Tamana namanamarina, eo aneru heta-hetabudi namanamaridi hinage.

Iesu ana ao ie ori

Mt. 17.1-8; Mk. 9.2-8

²⁷ Riba mamohoina ede ea heribamiu ta, headi inai se totoro mate sora nige se hearo, Eaubada ena basileia abo se itabagunaei.”

²⁸ Teina riba ta i ribaedi wa i lau e asubena haligigi-haiona se ohi, Petero, eo Ioane, eo Iamesi i woeaidi, i dalasae oea tupina eai, bena i lau-uura.

²⁹ Ma uurana, ana ao ie ori, eo ana lulu se posiposi, eo se balebalelem.

³⁰ Na ia maenayao tatao labui se ribariba, isi ede Mose eo Elia:

³¹ isi se taumasaraha ma namanamarina, ia matena se ribaribaei, ia Ierusalem eai abo i hearo.

³² Na Petero, ma ana sasaguyao, matadi se enoeno: isi se siliata ena namanamari se ita, eo taudi labui wa maenayao se totoro, edi namanamari hinage se ita.

³³ Taudi labui wa Iesu bena se laugabaei. Petero i ribalau Iesu arinai, i ene, “Tanuagagu e, i lolo

inai mo ta mia: apa haiona ta abidi: esau enam, eo esau Mose enana, eo esau Elia enana:” na i ribariba gaibu.

³⁴ Ma ribaribana eada esau i laoma i poitawaidi: isi se lulau eada wa boeana eai se matausi.

³⁵ Na arina esau eada boeana eai i laoma, i ene, “Natuyogoyogoigu ede teina: ia au ataiei.”

³⁶ Arina wa i lautom, Iesu se ita iabom ie mia. Isi se monomonouei, nei asubenadi eai ne ginauri se itadi wa nige tau esau se heriba.

Tauheaheata nige edi gigibori. Merumeru esau arinai demoni se aiduiei.

Mt. 17.14-21; Mk. 9.14-29

³⁷ Maraietom, oea tupina eai wa se letamao, tatao gamagaridi ia se laubagibagiei.

³⁸ Tau esau, boeadi eai, i eogalau, i ene, “Tanua-gagu e, ea awanorim ta, u italau natugu tau arinai, paana natueseesegagu mo.

³⁹ Earua gama wa i toai, eo ma esega i eabayaba; eo tauna i abigogoi awana i gosagosapuro, eo i heamamna, i abigabaei, abo hinage i laubodauio.

⁴⁰ Em heaheatayao ea awanoridi bena se aiduiei; isi nige abina se ata.”

⁴¹ Iesu ia arinana i heuio, i ene, “Omi isi ta nige emi sunuma, eo ma awaeagaramiu, huia lohaloha eau maemiu, eo ea taubigaimiu wa? Hage natum wa u woeaima.”

⁴² Ia i laoma, ma launa, na demoni gama wa i helubiei, eo i abigogoi, Iesu earua biibiina wa i ribamataei, gama wa abo i hemauro, ia abo i moseuio tamana arinai.

⁴³ Isi gamagaridi Eaubada ena gigibori lailai se noonooei.

Ginauri gamagamagari Iesu i ginauridi wa, isi gamagaridi ma noonoodi, ie ribalau ena heaheata aridi eai, i ene,

Iesu ia matena i ribauio
Mt. 17.22-23; Mk. 9.30-32

⁴⁴ “Teina ribadi ta taba se ludobi beamiu gudadi eai: paana Tau Natuna abo se moselaei tatao nimadi eai.”

⁴⁵ Ena riba wa nige se nuatui, riba wa se rib-ayamui arinai nige se ita: riba wa hinage bena se oimuriei se matausi.

Iesu i laugugua, ena riba paana ede merumeru
Mt. 18.1-5; Mk. 9.33-37

⁴⁶ Haiawayagara esau ie tubu isi boeadi eai, si ene eai aridi eai abo i sae ariri.

⁴⁷ Iesu edi nuatu i nuatulobai, merumeru gagirina ie abi, ia gegesina eai i hebawa.

⁴⁸ Ie ribalau aridi eai, i ene, “Tau esau eo esau merumeru ta i oiami debagu eai ia i oiamigu hinage: tau esau eo esau i oiamigu tauheta-mariguma hinage i oiami: paana ia gamagarimiu arimiu eai i gagiri konekone, ia abo i sae ariri ede.”

Iesu nanatunayao i ribasuudi
Mk. 9.38-40

⁴⁹ Ioane ia arinana i heuio, i ene, “Tanuagagu e, tau esau aie ita demoni i aiduiedi oa debam eai; ia ai ribanuahi paana ia nige i hemuriwataida.”

⁵⁰ Iesu i ribalau ia arinai, i ene, “Ia tabu au rib-anuahi: paana ede ia nige i hetataguduguduida ita enada meta.”

Iesu nuatu harihariuna ena heaheatayao i heatadi Galilaia i laugabaei, nige i uio

Io. 7.2-10

⁵¹ Huijana i hanahanauma ia bena se abisiniuiioi, ia nuana esega mo bena i sae Ierusalem eai.

⁵² Ena tauwasa matana eai i hetamaridi: isi se lau abo se lulage Samaria tataodi edi eanua esau, ena abamia bena se abi nonohai.

⁵³ Isi ia nige se oiami, paana ia nuana esega mo bena i sae Ierusalem eai.

⁵⁴ Ena heaheata Iamesi eo Ioane teina se ita, si ene, “Guiiau e, em nuatu saha, oeagi alaalasina abo ta lauhesom galewa eai i dobima tatao wa se alasiohi doha hinage Elia ena laulau wa?”

⁵⁵ Ia abo i torobui, taudi labui i ribasuudi, i ene, “Emi nuatu aniona nige au nuatui.

⁵⁶ Paana Tau Natuna nige i laoma tatao bena i unuidi, na bena i hemauridi mo.” Isi abo se lau eanua esau.

Iesu ena heaheatayao harihariudi nuadi i lauitadi

Mt. 8.18-22

⁵⁷ Dobila eai ma laudi, tau esau i ribalau ia arinai, i ene, “Guiiau e, em abalau gamagamagari eai abo ea hemuriwataim.”

⁵⁸ Iesu i ribalau ia arinai, i ene, “*Alope edi guda, eo malagaibu manudi edi noi; Tau Natuna uruna nige ena abaaiunuaena.”

⁵⁹ I ribalau tau esau arinai, i ene, “U hemuriwataigu.” Ia mo i ene, “Guiiau e, sora ea lau tamagu ea toretorettau baguna.”

* **9:58:** English edi riba: fox.

⁶⁰ Iesu i ribalau ia arinai, i ene, “Taumatemate enadi taumatemate abo se toretoretou: na oa mo u lau Eaubada ena basileia ribana u lauguguiaei.”

⁶¹ Tau esau hinage i ene, “Guiau e, eau abo ea hemuriwataim; sora ea lau baguna egu numa tataodi ea lauaioniedi.”

⁶² Iesu i ribalau ia arinai, i ene, “Tau esau ni-mana i torelaei tano abagiagiarina gigina eai, eo taba i sinibui, Eaubada ena basileia taba nige i abi.”

10

Iesu tatao-haiona-se-mate-saudoudoi i hetamari bagunaedi

Mt. 10.1-42

¹ Teina ginauri ta muridi eai Guiau tatao tatao-haionase-mate-soudoudoi i heterodi, labui, labui, ia matana eai abo i hetamaridi, eanua eo dimo gamagamagari ia bena abo i lau aridi eai.

² Arinai abo i ribalau aridi eai, i ene, “Aiai sunasunadi se gamagari ariri, tauabidi eseesegeadi mo: Guiau masuri wa tanuagana au uura arinai, bena tatao headi i hetamaridi aiai sunasunadi abo se abidi.

³ Emi dobila au lawataidi: ea hetamarimiu ta omi doha mamoe * luko boeadi eai.

⁴ Moni tobona, eo tobo, eo aeum tabu au laedi: eo dobila eai tabu tau esau au lautoiei.

⁵ Ena numa esau, esau, au awasae alodi eai, au riba baguna, au ene, ‘Loni bena ai tore numa eai ta!’

⁶ Ena loni natuna esau metai ie bawa, emi loni arinai i ota: ena nige’e, emi loni abo au abiuioi.

* **10:3:** Wolves: nuura kedewana esau, lailaina, aiailetana.

⁷ Meta numa me arinai au mia, ena aisadi, aisadi, se lediwa au ai eo au ainom: paana i lolo taupaisoa maisana se mosei. Tabu au lau hari numa, hari numa.

⁸ Eo ena eanua esau, esau, aue lage aridi eai, ena se eogaisinimiu, aiai aisadi, aisadi, se peiauri matamiu eai, au aiai:

⁹ nei eanua tataodi se asiebo au hemauidi, au ribalau aridi eai, au ene, 'Eaubada ena basileia ie lagemao, i hanahanauimiu.'

¹⁰ Ena eanua esau, esau, aue lage aridi eai isi nige se eogaisinimiu, au lau edi baubau dobiladi eai, au heribadi, au ene,

¹¹ 'Emi eanua geregeredi se patuimai, abo ai saugabaedi, abahegirumiu: taiede, riba mamohoina ede au nuatui, Eaubada ena basileia i lagemao, i hanahanauimiu.'

¹² Na ea heribamiu ta, nei asubenana ne, Sodoma abo si ene nige se baaea ariri, doha meta eanua me.

Iesu eanua headi i hegirudi.

Mt. 11.20-24

¹³ "Korasina kapore oa! Betesaida, kapore oa! Ena Turo eo Sidona aridi eai laulau gigiboridi se ginauridi doha se ginauri arimiu eai beabeaarinina eai wa nuadi se buidio; se babawa baeki se luidi, eo ahua eai se heahudi.

¹⁴ Hedudurai asubenana eai Turo eo Sidona abo nige se baaea doha omi.

¹⁵ Oa Kaperenauma hinage, se lauisinim galewa ewana eai, hade eai abo se gabadobem.

¹⁶ "Ia ena arinamiu i ataiei: arinagu hinage i ataiei: ia ena i isugaraemiu, eau hinage i isug-

araegu; ia ena i isugaraegu, ia tau hetamariguma hinage i isugaraei.”

¹⁷ Tatao tatao-haiona-se-mate-saudoudoi wa se uioma, ma kodedi si ene, “Guiau e, demoni hinage oa esam debana eai arinamai se ataiei.”

¹⁸ Ie ribalau aridi eai, i ene, “Satani ea ita doha namanamari, galewa eai i beuma.

¹⁹ Gigibori ea lediwa arimiu eai gaganade-nadewa aemiu eai au ututawaidi, eo waiununa ena gigibori gamagaridi emi gigibori abo i saetawatawai: eo taba nige ginauri esau abo i hebaaeamiu.

²⁰ Taiede tabu au kode paana earua baabaaeadi wa arinamiu se ataieyao; au kode mo paana galewa eai esamiu se uridio.”

²¹ Meta huiana eai wa Iesu Earua Tabuna debana eai, ie kode ariri eo i ene, “Tamagu e, galewa eo tanoubu Guiauna, ea lautoiem ta, teina ginauridi sonoga tataodi, eo sibasiba tataodi matadi eai u toreyamuidi, bebe mo aridi eai u hemasarahadi: taiede Tamagu e, oa matam eai u ene meta i lolo.

²² Ginauri gamagaridi Tamagu i ledimao arigu eai; nige tau esau Natuna i nuatui, Tamana mo iabom; eo nige tau esau Tamana i nuatui hinage, Natuna mo iabom, eo ia hinage arinai Natuna abo i hemasarahadi.”

²³ Ia abo i sinibui ena heaheatayao aridi eai, isibom enadi i ribariba, i ene, “Matadi se lolo, taba ginauri au itadi wa, abo hinage se itadi.

²⁴ Paana ina ea heribamiu ta, ginauri au itadi peroveta eo wasawasa gamagaridi se henua bena se itadi, nige se itadi; eo riba wa au ataiedi bena se ataiedi hinage, nige se ataiedi.”

Laugagaao tauna Iesu i hesioei

Mt. 22.34-40; Lk. 12.28-34

²⁵ Laugagaao tauna esau i toro bena Iesu i nohoi, i ene, Tauheata e, saha ea ginauri mauri nige nosina abo ea abi?”

²⁶ Iesu ie ribalau ia arinai, i ene, “Laugagaao bukana eai saha se uri? edoha em hasihasirina?”

²⁷ Ia arinana i heuio, i ene, “Guiiau em Eaubada u gadosisie ma nuam i ohi, eo ma earuam i ohi, eo ma adidirim i ohi, eo ma nuanuatum i ohi; eo helem taumia tauna u gadosisie doha hinage oabom u gadosisiuioim.”

²⁸ Iesu i ribalau ia arinai, i ene, “Em riba i dudurai; teina u abiwatai ede, abo u mauri.”

Parabole: Samaria tauna lolona.

²⁹ Ia mo, ena riba bena i hedudurai, i ribalau Iesu arinai, i ene, “Helegu taumia ede eai?”

³⁰ Iesu ia arinana i heuio i ene, “Tau esau Ierusalem eai ie dobi Ieriko, na tauaiaigirihai i hearodi, ana lulu se abihaidi, eo ia se laulaulubini abo se laugabaei, matena i hanahanau.

³¹ Kohena esau nei dobila eai ne i laulau ie lau: abo tau wa ie ita, i utugesi hari teha eai ie lau.

³² Hinage doha Levi tauna esau wau dimo wa arinai ie lage, i laoma i aiaiewaei, abo i utugesi hari teha eai ie lau.

³³ Samaria tauna esau ena lauwasia eai ie lau e ie lage tau wa ena aba ota eai, ia abo ie ita eo i nuatoatoaei.

³⁴ I lau ia arinai ana gai wa i sumadi, waina eo eausi i hegoilaedi ana gai eai, eo i hebawasae ena asini potana eai, i woeai i laei abaaitaumana edi numa eai, abo i itawatai.

³⁵ Mara-ie-tom ia abo i laugabaei, denari labui i abidi i mosedi numa tanuagana arinai, i ribalau ia arinai, i ene, ‘Ia u itawataikomakomani: ena moni nige gonogonoana, ea uioma abo ea hemaisam.’

³⁶ Tatao haiona ta aitea helena taumia tauna ede, wau tau wa arinai, tauaiaigirihai i hearodi wa?”

³⁷ Tau wa i ene, “Tau wa ia i nuatoatoaei.” Iesu abo i ribalau ia arinai, i ene, “U lau, meta doha hinage em abiabi.”

Mareta eo Maria ribadi.

³⁸ Isi se lau abo se lulage eanua gagirina esau eai: sine esau esana Mareta ia i eogaisini ena numa eai.

³⁹ Sine wa ena doga esana Maria, ia hinage Iesu aena gegesina eai i bawabigabiga, ena riba i ataatai.

⁴⁰ Mareta paisoa se hemode, i laoma Iesu arinai, i ene “Guiau e, nige u nuatuigu egu doga i laugabaegu eaubom ea paisoa ta? U heriba i saguigu.”

⁴¹ Iesu ia arinana i heuio, i ribalau ia arinai, i ene, “Mareta e, Mareta e, ginauri gamagaridi se hemodem, eo se henuadubum.

⁴² Ginauri esega i lolo: Maria ginauri lolona ina i hineri ta, teina ta taba nige ia arinai se abihaiuioi.”

11

Iesu uura ribana ie ribaei.

¹ Dimo esau eai, Iesu ma uurana, e i uura lautom, ena heaheata esau i ribalau ia arinai, i ene, “Guiau e, uura u heatamai, doha hinage Ioane ena heaheatayao i heatadi.”

² Ie ribalau aridi eai i ene, “Omi au uura, abo au ene,

“Tamamai e, galewa eai, oa esam se hetabuei. Em basileia bena i laoma. Em nuatu, tanoubu eai ta bena se lauwatai, doha hinage galewa eai laulauna.

³ Bena asubena esau, asubena esau, aiai ama u ledima.

⁴ Ema baaea ta u nuatugabaedi; doha hinage ai tauhebaeamai edi baaea ai nuatugabaedi, Ena noho ai hearodi tabu u hesagugabaemai; baaea eai oa u hesaguhaimai.”

Parabole: tau esau ena heriam arinai i aibodadaoi.

⁵ Iesu i ribalau aridi eai i ene, “Eai, omi arimiu eai, bulinuana eai i lau ena heriam arinai, i ene, ‘Egu heriam e, falawa haiona u sagenaidima;

⁶ ehagu esau ena abalauwasi eai i laoma arigu eai, nige egu haitala bena ea tore ia matana eai?’

⁷ Numa alo eai ia arinana abo i heuio, i ene, ‘Tabu u hegadotoagu: dohila se guduiyao, ma nanatuguyao ai enoo ema abaeno eai; taba nige ea toro ea lediwa.’

⁸ Ea heribamiu ta, ea ’ne ena nige i toro eo i mosei paana ia tau wa ena heriam, paana i awaawanoridaoi arinai abo i toro, eo ginauri aisadi, aisadi i henuadi wa abo i mosei.

⁹ Ea heribamiu ta, ea ’ne, Au aiboda, abo se lediwa; au eooi, abo au lobai; au ipeipesi, dohila abo se soeawa.

¹⁰ Paana esau, eo esau i aiaiboda abo i abi; eo ia i eooyoo abo i lobai; eo ia i ipeipesi dohila ia arinai abo se soe.

11 “Omi arimiu eai aitea tau natuna falawa i aibodai we’u abo i mosei wa? Eo eama i aibodai ia mota abo i mosei wa?”

12 Kamkam kasinona i aibodai abo gaganadenadewa i mosei?

13 Na, taba omi, baaea tataomiuyao abidi au atao ainauia lolodi au mosedi nanatumiuyao aridi eai: Tamamiu, galewa eai ie mia, Earua Tabuna abo i mosei tauaiaiboda aridi eai.”

Si ene Iesu demoni i aiduiedi Belesebulo ena gigibori eai

Mt. 12.22-37

14 Demoni esau Iesu i aiduiei, ia i tuutuuri. Demoni wa i lulagelau murimuri eai tau tuutuurina wa ie riba: tatao abo se noonoei.

15 Isi headi si ene, “Belesebulo demoni edi wasawasa debana eai demoni wa i aiduiedi.”

16 Headi hinage, ia se nohoi, heiheinoina bena se eoi galewa eai i laoma.

17 Edi nuatu i itadio, arinai i ribalau aridi eai, i ene, “Basileia ena isibom se haitoremuriuioi meta abo se tatagorigori; numa hinage ena isi se haitoremuriuioi abo se guri.

18 Ena Satani hinage iabom i haitoremuriuioi ena basileia abo edoha ena totoro? Paana au ene, Belesebulo debana eai demoni ea aiduiedi.

19 Ena eau Belesebulo debana eai demoni ea aiduiedi, nanatumiuyao eai abo debana eai se aiduiedi? Isi abo enamiu tau heduhedudurai.

20 Taba eau Eaubada nima-gigina eai demoni ea aiduiedi, mamohoi Eaubada ena basileia i lage-mao arimiu eai.

21 Tau adiadirina ena numa i itawatai ma alahiana, eo ma elepana, arinai ena gogo se ota komakomani.

²² Tau esa i adiaddirisom i laoma, tau wa i toai, ena alahia eo ena elepa eo ena abi gamagamagari i girihaidi, eo abi gamagamagari wa abo i soiedi.

²³ Ia nige i saguigu, ia abo i hetataguduguduigu: ia hinage maegu nige ai tanotanogogo, ia abo i hetatagorigori.

Tau iabom taba nige i heduduraiuioi

Mt. 12.43-45

²⁴ Earua biibiina tau esau i laugabaei, abo i laulau malapitapitari eai, ena abaaiyawasi i eoo; i eooasa nige i lobai, abo i ene, ‘Egu numa ea laugabaei wa abo ea uio arinai.’

²⁵ Ie lage, abo ie ita numa wa se uiauia eo se taubigaikomakomani.

²⁶ Ia abo i lau earua baabaaeariridi haligigilabui i abidi; abo se lulau ia boeana eai arinai se miahai; tau wa murina eai abo i baaea ariri, nige doha bagubagunana eai.”

²⁷ Teina riba ta i ribaei ma ribana na sine esau tatao boeadi eai i eaba lailai i ribalau Iesu arinai, i ene, “Bogana eai u laoma, eo susuna u madoidi se sae ariri.”

²⁸ Iesu abo i ene, “Isi mo se lolo ariri, Eaubada ena riba se ataiei, eo se sogohididini.”

Iona heiheinoina

Mt. 12.39-42

²⁹ Tatao se oigogoma ia arinai, se gamagari, ena riba i hetubu, i ene, “Teina isi ta i baaea; heiheinoina se eooi: heiheinoina taba nige se mosedi, Iona peroveta mo ia heiheinoina.

³⁰ Doha Iona Nineva tataodi edi heiheinoi ede, tau Natuna hinage teina isi ta ia edi heiheinoi.

³¹ Tupo eawana edi wasawasa sine abo i toro, teina isi ta tataodi i hegirudi, eo abo i hebaaeadi paana tanoubu sigasigana eai i laoma wa bena Solomona ena sonoga i ataiei, na esau ede ina Solomona i saetawatawai.

³² Nineva tataodi abo hinage se toro isi ta abo se hegirudi, eo se hebaaeadi: paana Iona ena gugua eai nuadi se buidi: esau ede ina Iona i saetawatawai.

Parable: kanela se healasi

Mt. 5.15-16; Mk. 4.21-22; Lk. 8.16

³³ Nige tau esau lamepa i healasi abo i toreyamui, eo gulewa eai hinage taba nige i hebuitawai, na ie tore lamepa ena abaota eai, isi se awasaema marana abo se ita.

³⁴ Tauhemara ede mata: ena matam i lolo esegai taum i ohihai hinage abo i mara-gudui: ena matam i baaea taum hinage i masigiri-gudui.

³⁵ U komakomanim mara boeam eai ata i masigiri.

³⁶ Ena taum i ohihai i mara gudui na nige tupo esa i masigiri, taum i ohihai abo i mara gudui, doha lamepa alapurupururuna i hemaram.”

³⁷ Iesu ena riba ma ribaribana na Parisea tauna esau ia i heriba bena ia maena se aiiai esega: to i awasae i bawabigabiga, bena i aiiai mo.

³⁸ Parisea tauna meta ie ita, i nooei, paana aiiai sora, Iesu nige i nimadeuri baguna.

Iesu Parisea nuadubu lailai abo se hearo i ribanonohai

Mt. 23.13-35

³⁹ Guiau i ribalau ia arinai, i ene, “Omi Parisea kaputi eo gaeba murimuridi mo au

heaadi: boeamiu eai hari baaea eo hari baaea se monauboriboriri.

⁴⁰ Au eauyaure, murimuri wa tauginaurina aloalo hinage i ginauri, e nige'e?

⁴¹ Emi ginauri aisadi au abidi wa au ainauiaedi; abo ginauri gamagaridi arimiu eai se heaadio.

⁴² Kapore omi Parisea tataomiu e! minete eo pagano eo lagau aiai gamagaridi au peini saudoudoi, lausoiso esega saudoudoi eai wa au ainaui: abidudurai eo Eaubada ena gadosisi nige au nuatui: i lolo wau wa au abiwatai, esau wa tabu au nuahuiedi.

⁴³ Kapore omi Parisea tataomiu e! paana sunago alodi eai abababawa saesaedi au gadosisiedi, eo abauneune eai bena se aitoiemiu.

⁴⁴ Kapore omi tauuriuri eo Parisea tataomiu e, omi tauboraborasom! Paana omi doha bousa nige se masaraha, eo tatao potadi eai se laulau nige se nuatuidi.”

Iesu laugagaeo tauheaheata edi nuadubu i ribaei.

⁴⁵ Laugagaeo taulauheata esau Iesu arinana i heuio i ene, “Tanuagamai e, oa u riba doha meta ai hinage u ribasuuimai.”

⁴⁶ Iesu abo i ene, “Kapore omi hinage laugagaeo tau-laulauheataena tataomiu e! Oibahe poro-porohedi tatao dabaearodi eai au hebaheidi, omi mo oibahe wa nige nima-gigimiu esega arinai au abilau.

⁴⁷ Kapore omi! paana peroveta bousadi numadi au hetorodi, tubumiuyao se unuhematedi wa.

⁴⁸ Arinai ede au hemasaraha ta tubumiuyao edi laulau au ene se lolo: mamohoi isi se unuhematedi, omi bousadi numadi au hetorodi.

⁴⁹ Arinai hinage Eaubada ena sonoga si ene, Peroveta tataodi eo aposotolo tataodi abo ea hetamaridi aridi eai, headi abo se unuhematedi, eo se heamamnadi:

⁵⁰ tanoubu se hetubu i laoma, i laoma, e peroveta gamagaridi osinadi se heboriri, teina isi ta arinai abo se hegirudi;

⁵¹ Abela osinana i laoma e Sakaria osinana hinage, ia se unui abaaitalasam hatahatana tabuna, eo numa uura ena birigom tabuna duaduaridi eai: mamohoi ea heribamiu ta, arinai abo se hegirudi!

⁵² Kapore omi laugagaeo taulauheataena e! Nuasonoga kina au laehesuara: omi nige au awasae, eo isi hinage bena se awasae au guduguidi.”

⁵³ Teina riba ta i ribalau aridi eai, ma ribaribana na tauuriuri tataodi eo Parisea tataodi ia se nohoi eo se hesohesom, riba gamagaridi bena abo i ribaedi:

⁵⁴ Isi abo se itaheteteusei, ena riba saha esau arinai bena se hegiru.

12

Iesu i ene Parisea edi obue se ita komakomani

Mk. 8.14-21

¹ Nei huihana, tatao se oigogo-esega se gamagari ariri, taba nige se hasiridi, se haihaiututawatawauioidi, arinai abo i ribahetubu ena heaheatayao aridi eai, i heribabagunaedi, i ene, “Parisea adi * obue au ita komakomani; meta edi laulau borabora.

* **12:1:** Yeast

² Paana ede nige ginauri esau se hebuitawai, na abotai abo se hemasaraha; eo nige ginauri esau hinage se toreyamui, na abo abina se ata.

³ Arinai ede saha eo saha au ribaedi masigiri boeana eai, na marana eai abo se ataiedi; meta hinage riba wa au riba moninihi biri alona eai, numa ewana eai abo se painaei.

⁴ “Egu heriamyao e, omi ea heribamui ta, ea ’ne, isi tauaiunui, tau ahaaha mo se unui, tabu au matausiedi, taiede taba nige ginauri esau se abi.

⁵ Ia mo matausina au matausi ia ede ea ribah-esanapunonohaimui ta: ia au matausiei, taumi mo i unuidi, eo hinage ena gigibori eai abo i gabadobemui Gehena boeana eai; mamohoi ea heribamui ta, ia mo bena au matausiei ede!

⁶ Manu gagiridi se uneuneidi pene labui maisadi wa, na Eaubada matana eai nige esau se nuagabaei?

⁷ Urumui maiawadi gamagaridi se hasiriheohidio. Arinai ede tabu au matausi: omi emi lolo wau manu gagiridi gamagaridi wa au saetawatawai.

⁸ Hinage ea heribamui ta, ea ’ne, esau eo esau tatao matadi eai i wasawasaegu, tau Natuna hinage ia abo i wasawasaei Eaubada ena aneru matadi eai:

⁹ na ena esau, tatao matadi eai i halelegu, Eaubada ena aneru matadi eai ia hinage abo se halelei.

¹⁰ Ena tau esau eo esau tau Natuna arinai riba baaea i ribaei, ena baaea abo se ribagigiri: na ena Earua Tabuna arinai riba baaea i ribaei, ena baaea taba nige se ribagigiri.

11 Eo ena se woeaimiu sunagodi eai, eo tauhedudurai eo tanuaga matadi eai, arinadi bena au heuioidi, eo saha eo saha abo au ribaedi, tabu au nuatu nonohai.

12 Paana Earua Tabuna nei huiana ne ia abo i hesibasibamiu saha eo saha abo au ribaedi.”

13 Edi pele esau i ribalau ia arinai, i ene, “Tanuagagu e, egu tau u heriba bena tamamai ena gogo i soiedima.”

14 I ribalau ia arinai, i ene, “Tau e, eai i hetorogu enamiu tauhedudurai, eo enamiu tausoisoi eau?”

15 Abo i ribalau isi aridi eai, i ene, “Au komakomanimiu, gogo tabu nuamiu se lauedi: tatao gogo gamagamagari se abidi, meta edi mauri nige’e.”

Parabole: taumonamonaune eauyaure.

16 Parabole esau i heribadi, i ene, “Tau monamonaune ena oea i masuri ariri:

17 abo iabom ena nuanuatu, i ene, “Saha abo ea abi, egu masuri nige egu abapeiaurina?”

18 Abo i ene, ‘Teina mo abo ea abi: egu sanara abo ea lopahaidi, lailaidi ea abidi: alodi eai egu masuri, eo egu gogo egu abapeiauri.

19 Nuagu ea ’ne, Nuagu e, gogo gamagaridi u peiauridi borimai gamagamagari adi laubagi: abo u aiyawasi, u aiai, u nomnom, eo u kode.’

20 Na Eaubada i ribalau ia arinai, i ene, ‘Oa eauyaure, maiona ta earuam abo se abihai: wau ginauri wa oa u peiauridi wa abo aidimo enadi?’

21 Doha ede ina ia gogo i peiauri iabom enana, eo nige ena gogo Eaubada arinai.”

22 Ie ribalau ena heaheatayao aridi eai, i ene, “Arinai ede ea heribamiu ta, ea ’ne, Tabu maurimiu au nuatudaoiei, saha abo au ai; eo taumi saha abo au helui.

²³ Mauri mo i sae ariri ede, aiai nige'e, taumiu hinage se sae, lulu nige'e.

²⁴ Boeobo eo au nuatuidi: nige adi se uma; eo nige adi se paipaisoa; eo nige edi sitoa, eo edi sa-nara nige'e; na Eaubada mo i heaidi; omi manudi au saetawatawaidi, e nige'e?

²⁵ Esau arimiu eai taba i nuatudaoi abo siarina i heloha kubita esega wa?

²⁶ Ginauri gagiridi wa nige abina au ata, ginauri gamagaridi omi saha au nuatudaoiedi?

²⁷ Oea baeobaeodi se inima au nuatui: isi nige se paisoa, eo nige se lulu haturi; hinage ea heribamiu ta, Solomona ana tepo lolodi eai ana ao nige i lolo doha hinage isi.

²⁸ Taba Eaubada ina doha oea leidi i heluidi, wau ie ota oea eai, maraitom se gabu um boeana eai: omi abo nige i heluimiu wa, sunuma gagiri tataomiu e!

²⁹ Eo saha abo au ai, eo saha abo au nom, tabu au eoo, nuamiu tabu se dagugu.

³⁰ Paana teina ginauri gamagaridi tanoubu enadi se eoidi: Tamamiu hinage i nuatuiyao omi teina ginauri gamagamagari bena au abidi.

³¹ Eaubada ena basileia mo au eooi: abo teina ginauri gamagaridi se hepatulediwa arimiu eai.

³² "Eawoi gagirina e, tabu au matausi; paana ede Tamamiu ena gadosisi lailai bena basileia abo i leawa.

³³ Emi gogo au uneuneidi, eo au aiainauiaedi; tobo abo au abidi taba nige se beabea, gogo wa galewa eai taba nige i ohi, arinai nige tauaiyahari i awasae eo hinage motamota nige se hebaaea.

³⁴ Haedi emi gogo abatorena, nuamiu ede metai.

Ia taumasarahana ribadi Iesu i ribahesana-punonohaidi

³⁵ “Taumi au taididini miu, eo omi emi lamepa au healasinonohaidi;

³⁶ omi hinage abo doha tatao edi Guiau se laubagibagiei, tawasora mataasina eai bena i uioma; ia i laoma eo i ipeipesi, arinai abo ma esega dohila se soe.

³⁷ Meta heaheari se lolo, Guiau ena huia laoma i hearodi ma silasilawahetetedi: mamohoi ea heribamiu ta, ia abo i taididini uioi, abo i hebawabigabigadi se aiai, eo i laoma i taubigaidi.

³⁸ Ena bulinuana eai i lagema, e ena kamkam ie dou i lagema, isi ma silasilawahetetedi i lobaidi, meta heaheari se lolo.

³⁹ Teina ta au nuatui, ena numa tanuaga i nuatui mahana hisa tauaigirihai abo i laoma, ia abo i silasilawa eo taba nige se awasae ena numa eai.

⁴⁰ Omi hinage abo au abihetoanonohai: paana tau Natuna abo i laoma ena huia laoma nige au nuatui.”

Parabole: Numa tautawataina ena heaheari.

⁴¹ Petero abo i ribalau ia arinai, i ene “Guiau, e, wau parabole ta u ribaeyama enamai, e tatao gamagaridi enadi?”

⁴² Guiau i ene, “Eai heaheari tauna i lolo, eo i sonoga, ena Guiau abo i hetoro ena numa tataodi tanuagadi eai i lau, huia gamagari adi aiai abo i mosedi?”

⁴³ Heaheari wa i lolo ena guiau i lagema i lobai ena laulau nei doha.

⁴⁴ Mamohoi ea heribamiu ta, ia abo i hetoro ena gogo gamagaridi tanuagadi eai i lau.

⁴⁵ Na, heaheari wa ena nuaboeana eai i ene, ‘Egu guiau ena laoma taba nige i heulama’; ena heaheari, tatao eo sisine, i pidiridi eo i aiai eo i nomnom eauyaure.

⁴⁶ Asubena esau, heaheari wa nige i nuatuhetoa, ena guiau abo i lagema, mahanana hinage nige i nuatui, eo ia abo i helautom, tatao riba nige se ataataiedi aridi eai i heoiesegaidi maenayao.

⁴⁷ Meta heaheari, ena guiau ena nuatu i nuatuiyao, eo nige i abihetoanonohaiuioi, eo ena nuatu nige i abiwataidi, abo se lubilubini eo se pidiri.

⁴⁸ Taba tau esau nige abina i ata, ena laulau debana eai taba se pidiri, taiede taba nige se pidiridaoui. Paana tau esau ginauri gamagaridi se mosei wa, ia arinai hinage gamagaridi bena se abiuioidi: ia hinage tatao ginauri gamagaridi se mosedi, aridi eai ginauri gamagaridi hinage abo se hetaladi.

Keriso tatao i peilabuidi.

⁴⁹ “Ea laoma ta oeagi alaalasina abo ea gabadobei tanoubu potana eai ta; egu gadosisi saha? ea ’ne taba se healasi maodai!

⁵⁰ Na, eau bapatiso esau arinai abo se hebapati-soigu; nuagu i hisihisili i lau e abo ea heohi!

⁵¹ Omi au ene ea laoma ta bena loni ea leama tanoubu eai ta? Ea heribamiu, nige’e; ea peil-abuiemiu mo.

⁵² Paana ede maraitom-asubena numa esega tataodi haligigi se mia: haiona, labui abo se hewa-hewaiunuuioidi, eo labui, haiona abo se hewa-hewaiunuuioidi.

⁵³ Tamana, natuna tau abo i hewaiunu, eo natuna tau tamana abo i hewaiunu; sinana natuna siu abo i hewaiunu, eo natuna siu sinana abo i hewaiunu; lawana ia malawana abo se hai-hewaiunuuioidi.”

⁵⁴ Ie ribalau hinage tatao aridi eai, i ene, “Ania dubana teha lalasi eai au ita, abo au ene, ‘Nabu abo i leama;’ abo hinage ie taru.

⁵⁵ Eo eawana i toama, abo au ene, ‘Mahana abo i posinasina;’ abo hinage ie tubu.

⁵⁶ Omi tauboraborasom, galewa eo tanoubu aniadi au italobaidi; edoha teina huia ta hinage nige au italobai?

⁵⁷ “Aue saha omibom laulau dudurai nige au nuatui?

⁵⁸ Em waiunu maidam au lau tauheduhedudurai matana eai, dobila eai aue lau u aipate u aulabi ia arinai; ata i woeaim tauhedudurai matana eai, eo ia hinage abo i moselaem polisimani arinai, eo ia abo i gabasaem numa tutugudu alona eai.

⁵⁹ Ea heribam ta, taba nige u pesagabaei, sora moni gamagaridi wa u hemaisaheohidi i lau e pene gagirina anasiga!”

13

¹ Nei huiana ne, tatao headi metai ia se heriba, si ene, “Pilato, Galilaia tataodi osinadi i heboririesegaidi, edi aitalasam.”

² Iesu arinadi i heuio, i ene, “Omi emi nuatu, au ene Galilaia tataodi gamagaridi aridi eai teina Galilaia tataodi isibom mo se baaea, paana amamna ta se hearodi?

³ Ea heribamiu ta, ea 'ne, nige'e: na ena nuamiu nige au buidi, omi gamagarimiu sora hinage abo au mate nei doha.

⁴ Meta tatao saudoudoi-haligigi-haiona hinage, Siloama bonana ie guri potadi eai, isi se mate wa: omi au ene Ierusalemata tataodi gamagaridi aridi eai isibom mo bena se baaea?

⁵ Ea heribamiu ta, ea 'ne, nige'e: na ena nuamiu nige au buidi omi gamagarimiu sora abo au mate nei doha."

Parabole: Suke, nige aiaina

Is. 5.1-7; Mt. 21.18-20

⁶ Teina parabole hinage abo i heribadi i ene, "Tau esau ena vine oeana alona eai kuhou esau i umai; i laoma aiaina i eooi, nige i lobai.

⁷ Vine oeana tautawataina ia i heriba, i ene, 'Borimai haiona ea laoma kuhou aiaina ea eooi, nige ea lobai: u oiheguri; oea saha i hewaa?'

⁸ Ia arinana i heuio i ribalau ia arinai, i ene, 'Guiau e, sora i otawa, teina borimai ta sora tano ea hebigabiga hetaiiri, eo ea samui:

⁹ ena aiaina aboi tore, i lolo: ena nige'e, abotai abo u oiheguri.' "

Sine esau ena asiebo se helautom.

¹⁰ Sabate esau sunago esau alona eai i lauheataedi.

¹¹ Na, sine esau i dabadabaruru, borimai saudoudoi-haligigi-haiona i asiebo, ia dagelana ie eou, toro i heasaasaei.

¹² Iesu sine wa ie ita i eogai, i ribalau ia arinai, i ene, "Sine e, em asiebo abo i tatapesa."

¹³ Ia nimana i saosaei ia potana eai: ma esega abo i dudurai, ia Eaubada i aihelahui.

¹⁴ Sunago tanuagana nuana i baaea paana ede Iesu asubena sabate eai i abi hemaui, ia abo arinana i heuio, i ribalau tatao aridi eai, i ene, “Asubena haligigi-esega tatao se paisoaidi: arinai se laoma bena se mauri: sabate asubenana eai nige’e.”

¹⁵ Guiau ia arinana i heuio i ene, “Oa tauborab-orasom, sabate asubenana eai gamagarimiu emi bulumakau, e emi asini edi numa eai au eairidi, eo au laedi goila bena se nom wa?”

¹⁶ Eo teina sine ta hinage ia Aberahama tubuna esau, Satani ia i auau, borimai saudoudoi-haligigi-haiona, asubena sabate eai ana auau abo se eairigabaei, e nige’e?”

¹⁷ Wau riba wa i ribaedi, abo ana papate se taumaeamaea: na tatao gamagaridi se kode ariri paana ginauri lololodi gamagaridi i ginauridi.

Parabole: sinapi uauana

Mt. 13.31, 32; Mk. 4.30-32

¹⁸ Ia abo i ene, “Eaubada ena basileia doha saha? Saha abo arinai ea heaheasoniei?”

¹⁹ Ia doha hinage sinapi tumana esau, tau esau ie abi, i hesuru ena oea eai; abo ie ini abo i hemala oeagi lailai; malagaibu manudi abo se toalau lagana eai.”

Parabole: obue

Mt. 13.33

²⁰ Eo i ribauio hinage i ene, “Saha arinai Eaubada ena basileia abo ea heaheasoniei?”

²¹ Ia doha hinage yeast sine esau ie abi falawa nonoi haiona boeadī eai i toreyamui, e abotai abo i sese ohi.”

Se lau Ierusalemā dobilana eai, Iesu i lauheatadi.

²² Eanua lailaidi eo eanua gagiridi abo i baeawaidi, i lauheataedi, ie lau Ierusalemā dobilana eai.

²³ Tau esau i ribalau ia arinai, i ene, “Guiāu e, tatao eseesegadi mo abo se mauri?” Ie ribalau aridi eai, i ene.

²⁴ “Adidirimiu au abi, abo au lulagelau dobila gagirina arinai: paana ea heribamiu ta tatao gamagaridi bena se lulagelau, abina nige se ata.

²⁵ Ena numa tanuaga i toro’o, dobila i guduyao, eo omi au totoro murimuri eai dobila eai au ipepesi, au ene, ‘Guiāu e, Guiāu e, dobila u soeama:’ ia abo arinamiu i heuio, i ribalaowa arimiu eai, i ene, ‘Omi aidobu, ea hekaumiu.’

²⁶ Omi abo au riba, au ene, ‘Ai aiai, eo ai ainom matam eai, ema baubau eai u lauheata wa.’

²⁷ Ia abo i ene, ‘Ea heribamiu ta, ea ’ne, Emi abalaoma nige ea nuatui; au laugabaegu, omi gamagarimiu laulau baaea tauabidi.’

²⁸ Metai abo se doudou, eo moadi se taburuyahisidi, huiana ne Aberahama, eo Isaako, eo Iakobo eo peroveta gamagaridi, Eaubada ena basileia eai abo au itadi, omi mo abo se aiduiemiu murimuri eai.

²⁹ Isi headi teha aruabu, eo teha lalasi, teha bauri, eo teha eawana aridi eai se tupagogoma, eo se bawabigabiga Eaubada ena basileia eai.

³⁰ Isi headi taumurimurita abo se bagubaguna, eo isi headi taubagubaguna abo se murimurita.”

³¹ Nei asubenana ne, Parisea, tataodi headi se laoma, se ribalau ia arinai si ene, “U lau udoi hari tupo eai: paana Heroda bena i unuim.”

³² Ia i ribalau aridi eai i ene, “Au lau alope me au heriba, au ene, ‘Demoni ea aiduiedi, eo wau ta eo maraitom tau asiasiebo ea hemauidi, eo asubena hehaionana eai abo egu lau ea heohi.

³³ Taiede wau ta, eo maraitom, eo asubena esau, egu dobila eai ea laulau; paana peroveta tauna taba nige hari eanua se unui, Ierusalem eai mo.

Iesu Ierusalem e i laukaporei

Mt. 23.37-39; Lk. 19.41-44

³⁴ Ierusalem e, Ierusalem e, peroveta tauunuunuidi, eo isi se hetamaridi wa taulauweuidi; huia gamagamagari nanatumyao bena ea heoigogoidi, doha kamkam mabena eai nanatunayao i obatawaidi, na au awaeagara!

³⁵ Emi numa ahaahana mo se nuagabaei mamohoi, ea heribamiu ta, ea ene, Taba nige au itauioigu, i lau e huiana i lagema omi abo au ene, ‘Ia Guiau esana eai i laoma, i lolo!’ ”

14

Iesu sabate eai tauasiebo i hemaui.

¹ Asubena sabate Iesu i awasae Parisea edi bada esau ena numa eai, bena i aiai, ia se itaitahetete.

² Na, tau esau ia matana eai asiebo osina i taguri.

³ Iesu i ribalau laugagaeo tataodi eo Parisea tataodi aridi eai, i ene, “Au ene i lolo asubena sabate eai ta hemahemaui wa?”

⁴ Isi se monomonou. Iesu tau wa abo i laei, i hemaui, eo i hetamari i lau;

⁵ isi arinadi i heuio, i ene, “Omi arimiu eai, eai ena asini e ena bulumakau ena i beu hua eai asubena sabate eai ia abo nige i abisini?”

⁶ Teina riba ta se ataiei, hemaisana nige abina se ata.

Parabole: aitaumana iabom i nuatuuiioi.

⁷ Parabole esau isi tatao se eogayogaidi se aitaumana wa enadi ie riba, paana i itadi biri saesaedi se abihineridi; i ribalau aridi eai, i ene.

⁸ “Ena tau esau tawasora mataasina arinai i eogaim, tabu u bawabigabiga abababawa saesaena eai; ata tau wasawasa lailai esau se eogai hinage;

⁹ ata tauyogaim wa i laoma, i ribalau arim eai, i ene, ‘Tau ta abababawa ta u mosei arinai;’ ata doha u taumaeamaea u babawa abababawa dobidobina eai.

¹⁰ Na, ena se eogaim, u lau abababawa dobidobina arinai u bawabigabiga; tauyogaim wa abo i laoma, abo i ribalaowa arim eai, i ene, ‘Egu heriam e, u bawasae:’ isi maemyao au aiaigogo arinai abo se hede-basaem

¹¹ Paana ede, tau esau eo esau iabom i hede-basaeuioi abo se heguri hegagiri; ia mo i nuatudo-bidobiuiioi abo se hede-basae.”

¹² Ia abo i ribalau tauyoga wa arinai, i ene, “Ena asubena aiaina, eo maiona aiaina u ginauri nonohai, em heriam, eo em tataoyao, eo ehamyao, eo helem tau mia monamonaune tataodi tabu u eogaidi; ata isi hinage se eogaim, abo hinage se hemaisam.

¹³ Ena mataasi u ginauri, gogogesagesa tataodi eo tautubutubuyaeyaelua tataodi, eo taulaulaudae tataodi, eo taumatagibugibu tataodi, u eogaidi.

¹⁴ Oa abo u lolo; paana isi bena se hemaisam nige abina se ata; taulaulaududurai se torouio huiana eai abo se hemaisam.”

15 Tau esau maedi se aiai esega, teina riba ta i ataiedi, abo i ribalau Iesu arinai i ene, “Ia Eaubada ena basileia eai i aiai, abo i lolo.”

Parabole: mataasi lailai

Mt. 22.1-14

16 Iesu abo i ribalau ia arinai, i ene, “Tau esau aiaigogo mataasina, tatao gamagamagari i eogaidi.

17 Aiai huiana wa ena heaheari i hetamari tatao i eogaidi wa i heribadi, i ene, ‘Au laoma, ginauri gamagaridi se suasuamaodao.’

18 Isi gamagaridi nuadi esega, se awaeagara. Taubagubaguna i ribalau ia arinai, i ene, ‘Tano esau ea uneunei, abo ea lau hage ea ita: agutoi, u heriba u ene ea bawa.’

19 Tau esau abo hinage i ene, ‘Bulumakau edi auaugogo haligigi ea uneunedi, abo ea lau hage ea itasipoidi: agutoi, u heriba u ene ea bawa.’

20 Esau hinage i ene, ‘Sine esau ea tawasorai, arinai nige ea laowa.’

21 Tauheaheari wa abo i laoma teina riba ta ena Guiau i heriba. Numa tanuagana abo i ouyalayala, i ribalau ena heaheari arinai, i ene, ‘U pesa heuheula eanua dobiladi eo baubaudi u lauwataidi, gogogesagesa tataodi, eo tauyaeyaelua tataodi, eo taulaulaudae tataodi, eo taumatagibugibu tataodi u woeaidima.’

22 Heaheari i ene, ‘Guiiau e, se abi nonohaiyao doha wau u lauhesomdi wa, numa mo sora nige i monau.’

23 Guiiau i ribalau ena heaheari arinai, i ene, ‘U pesa dobila lailaidi eai, eo gana hasaridi dobiladi

u lauwataidi, u lauhesomdi abo se laoma, egu numa bena i monau.

²⁴ Paana ede ea heribamiu ta, Tatao se eogaidi wa taba nige esau agu aiai begana i ai.’ ”

Iesu ena heaheatayao i lauitauioidi.

Mt. 10.37-39

²⁵ Na, moutuadi lailai ia maenayao se lau: ia i torobui, i ribalau isi aridi eai, i ene,

²⁶ “Ena tau esau i hemuriwataiguma, ia tamana eo sinana, eo monena, eo nanatunayao, eo ena tataoyao, eo lounayao, eo ia iabom hinage, nige i hewaiunuei, ia taba nige egu heaheata eai i lau.

²⁷ Tau esau eo esau ena satauro nige i bahei, eo i hemuriwataigu, ia taba nige egu heaheata eai i lau.

Parabole: bonana ribana.

²⁸ Paana ede aitea tau arimiu eai, ena bona bena i tarini, ia i bawabigabiga baguna, maisana i hasiri, ena moni gonogonoana abo i ginauri heohi, e nige’e?

²⁹ Ata paana i tarini bagunai, hinage nige ena abaheohina, eo tatao gamagaridi se ita ia se alaliuiaei.

³⁰ Si ene, “Tau ta ena bona i tarini hetubu, eo i ginauriasaeai, nige i ginauri heohi.’

Parabole: wasawasa i lau i iala.

³¹ Eo aitea wasawasa, hari wasawasa bena i ialaei, nige i bawabigabiga bagunai, abo i nuatui ena iala tataodi tausani saudoudoi, ana waiunu ena iala tataodi tausani tau-esega-i-mate abo ni-madi gonogonoana?

³² Ena nige se adidiri, esau wa sora eda lohaloha eai, tautauwasa i hetamari loni ribana i ribaei.

³³ Doha hinage tau esau, eo esau, arimiu eai, ena gogo gamagaridi nige i laugabaedi, taba nige egu heaheata eai i lau.

Parabole: arita i tomatoma.

³⁴ Arita i lolo: ena arita wa i arita lautom, edoha ena ariaritaui?

³⁵ Nige ana abi tano eai, eo nige se tore alami boeana eai; tatao abo se gabaei mo. Ia beana eai i ataiei, abo i ataieididini.”

15

Parisea tataodi se gadigadigugu.

¹ Takasi tau-tanogogo tataodi eo baaea tataodi gamagaridi abo se laolaoma ia arinai, arinana bena se ataiei.

² Parisea tataodi eo tauuriuri tataodi, se gadigadigugu, si ene, “Teina tau ta baaea tataodi i eogaisinidima, eo maenayao se ai ai esega.”

Parabole: mamoe i tauyamui

Mt. 18.12-14

³ Teina parabole ta i ribalau aridi eai, i ene.

⁴ “Aitea tau arimiu eai ena mamoe handere esega i abidi, ena esega i gege, ninety-nine i laugabaedi, i lau esau ie gege wa i eooi, i lau e abo i lobai?

⁵ I lobai, i toresae dabaeearona eai, ma nulolona.

⁶ I lagema ena numa eai, ehanayao eo helena tau mia i heoigogoidi, i ribalau aridi eai, i ene, ‘Ehei ta kodegogo, egu mamoe ie gege wa ea lobaiyao.’

⁷ Ea heribamui ta, galewa eai abo hinage se kode doha meta tau baabaaea esega

taba nuana i bui; taulaududurai tataodi tatao-hasi-se-mate-saudoudoi-haligigi-hasi nige edi nuabui, galewa eai taba nige se kodeidi.

Parabole: moni se tauyamui.

⁸ Hinage aitea sine ena moni saudoudoi i abidi, esega i tauyamui, eo lamepa nige i healasi, eo ena numa i uiuia, eo i eoo komakomanini, i lau e abo i lobai?

⁹ Ia i lobai ehanayao, eo helena tau mia tataodi i heoigogoidi, i ene, 'Ehei ta kodegogo, paana moni wa i tauyamui ea lobaiyao.'

¹⁰ Ea heribamui ta doha meta hinage Eaubada ena aneru matadi eai abo se kode, tau baabaaea esega taba nuana ie bui."

Parabole: natuna tau i tauyamui.

¹¹ Ia abo i ene, "Tau esau ia nanatunayao tatao labui:

¹² tau murita i ribalau tamana arinai, i ene 'Tamagu e, gogo tupona u ledima enagu.' Ena gogo gamagamagari abo enadi ie soi.

¹³ Nige baeana tau murita ena gogo gamagamagari abo i peigogoidi, ia abo i lau eanua esau eda lohaloha eai, nei eai ena gogo i aihegohegoilaedi laulau baaea aridi eai.

¹⁴ Ena gogo wa abo se ohi, guriam lailai ie tubu nei oea eai ne; ia abo i guriam.

¹⁵ Ia abo i lau nei eanua tauna esau i patulau ie mia arinai; ia abo i hetamari ena gana eai, ena sarai i heaheaidi.

¹⁶ Ia sarai adi aiiai mo bena i aidi, abo bogana i sese: nige ana aiiai tau esau i mosei.

17 Arinai ia nuana abo ie sae, i ene ‘Tamagu ena heaheari tataodi i hemaisadi adi aiai ureadi se aitoredi se ota, eau mo ea guriam matemate ta!’

18 Nuana ea torohai ea lau tamagu arinai, abo ea ribalau ia arinai, ea ’ne, ‘Tamagu e, ia galewa eai ie mia ea hebaaea, eo oa matam eai hinage ea baaea.

19 Eau natum se ribaegu nige ea lolo, eau abo ea hemala em heaheari esau doha isi hinage u hemaisadi ne.’

20 Ia abo i torohai, i laoma tamana arinai. Tamana i itaitalau ia ie ita eda lohaloha eai, i nuatoatoai, abo i aitautau, i heaitalagadoi, ia abo i alagoiei.

21 Natuna i ribalau ia arinai i ene, ‘Tamagu e, ia galewa eai ie mia ea hebaaea, eo oa matam eai hinage ea baaea, nige ea lolo si ene bena natum eau.’

22 Tamana abo i ribalau ena heaheari tataodi aridi eai, i ene, ‘Lulu lolo-aririna au leama, ia au helui; nimaau ia nimana eai au tore; eo aeum aena eai au toredi hinage:

23 bulumakau natuna tubutubu-lolona au woeiama au unui; abo ta aiai, eo ta kodegogo.

24 Paana ede natugu ta i mateo, na i mauriuio: i tauyamui, ta lobaiuioi.’ Isi abo se kodegogo.

25 “Tau baguna ia oea eai: ia abo i laoma numa i hanahanau, huelele eo se saga arinadi i ataiei.

26 Heaheari tauna esau i eogai, i oimurini, nei ginauri saha.

27 Ie ribalau ia arinai, i ene, ‘Am taumurita ie lage: tamam bulumakau tubutubu-lolona i unui; paana ia i lobaiuioi, ma maurina eo ma lolona.’

28 Ia abo i ouyalayala, nige i awasae numa alo eai: arinai tamana ie pesa ia i heriba-hebigabiga.

²⁹ Ia arinana i heuio, i ribalau tamana arinai, i ene, ‘Borimai gamagamagari ea hesosoam, eo em laugagaeo ribana nige ma esega ea utusi; goti natuna esau nige u leama enagu, ma egu heriam abo ai kodegogo.

³⁰ Teina natum ta i laoma, em gogo i aihegohegoilaedi sisine baeaa aridi eai, bulumakau natuna tubutubu-lolona u unui ana.’

³¹ Tamana i ribalau ia arinai, i ene, ‘Natugu e, huia gamagamagari u miatahitahi arigu eai: egu gogo gamagaridi oa enam.

³² I lolo ta kode, eo nuada se lolo, paana ede em goroa ta i mateo, na i mauriuio: eo i tauyamui na ta lobaiuioi.’ ”

16

Gogo tautawataina baeana.

¹ Ia i ribalau ena heaheatayao aridi eai i ene, “Tau monamonaune esau, ena gogo tanuagana se hegiru, si ene, ena gogo i aihegohegoilaedi.

² Tau wa i eogai, i ribalau ia arinai, i ene, ‘Wasam ta ea ataiei, edoham, ue saha? oa gogo tanuagadi em abiabidi hage u heribaguma: ata gogo ta abo u tanuaga lautom.’

³ Gogo tanuagana iabom ena nuatu, i ene, ‘Abo edohagu? egu guiau gogo tanuagana hewauna eai abo i helautomgu ta: tano giarina nige abina ea ata, awanorina ea taumaeamaea.

⁴ Egu nuatu ta abo ea hetubu ede, taba gogo ta ea tanuaga lautom abo hinage se eogaisinigu edi numa alodi eai.’

⁵ Guiau ena ginauri ena abamose-hagahagaidi tataodi i eogaidi, esau i bagunama i hesio, i ene,

‘Am haga wa hisa, sora egu guiau nige u hemaisadi wa?’

⁶ Ia abo i ene, ‘Eausi nonoi handere esega.’ I ribalau ia arinai, i ene, ‘Em uriuri pepana u abi, u bawabigabiga heuheula, abo nonoi tatao-labui-se-matesoudoudoi u uridi.’

⁷ Abo i ribalau esau arinai, i ene, ‘Am haga wa hisa? Ia abo i ene, ‘Sitona nonoi handere esega.’ I ribalau ia arinai i ene, ‘Em pepa u abi tatao-hasi-se-mate u uridi.’

⁸ Gogo tanuagana ena laulau se gewagewa wa guiau i awaloloei paana i nuatu sibasiba: teina tanoubu merumerudi isidi se sibasiba ariri, marana merumerudi nige se sibasiba doha.

⁹ Ea heribamiu ta, gogo baaea debana eai taba au awa-eha; ena i lau baaea isi abo se eogaisin-imiu abamia tahitahi eai.

¹⁰ “Ia ginauri gagiridi i abiloloedi abo ginauri lailaidi hinage i abiloloedi: ia ginauri gagiridi nige i abikomakomanidi, abo ginauri lailaidi hinage nige i abikomakomanidi.

¹¹ Ena gogo arinai nige au abiloloei, eai gogo mamohoi abo i lediwa bena au itawataidi?

¹² Ena tau esau ena gogo nige au itawataikomakomani, omibom emi gogo eai abo i lediwa?

¹³ Nige heaheari esau ena tanuaga labui i heaeaiedi, esau abo i hewaiunuei, esau i gadosisiei: e esau i nuatui, esau i tausiololoei. Eaubada eo mamona taba nige au heaeaietegaidi.”

Iesu Parisea arinadi i heuio.

¹⁴ Parisea tataodi hinage, moni taunuanuaiedi, teina riba gamagaridi ta se ataiedi: ia se alaliulu-uaei.

¹⁵ I ribalau aridi eai, i ene, “Tatao matadi eai omibom mo au heduduraiuioimiu: Eaubada nuamiu i italobaidio: paana ginauri tatao se hede-basaedi, Eaubada matana eai se baaea ariri.

¹⁶ “Laugagaeo eo peroveta huiadi se laoma e Ioane arinai: murina eai Eaubada ena basileia se guguaiei, eo tatao gamagaridi se lau adidiriesega se lulau boeana eai.

¹⁷ Galewa eo tanoubu abo se lautom, laugagaeo eai mo taba nige iota esau i lautom.

Iesu inawase ribana i ribaei

Mt. 5.31, 32; 19.3-11; Mk. 10.2-12; 1 Kor. 7.10-15

¹⁸ “Tau esau eo esau monena i inawasei, sine esau abo i tawasorai i ganaganawari; eo tau esau eo esau sine wa monena i inawasei wa i tawasorai ia hinage i ganaganawari.

Tau monamonaune eo Lasaro.

¹⁹ Tau monamonaune esau, ana lulu buiabuiana eo *linen* lolona i luidi, eo asubena gamagamagaridi aiai lolodi mo i aiaidi.

²⁰ Tau awaawanori esau esana Lasaro, tau wa ena dobila guduna eai se heota, ia tauna bonu se laugirihai.

²¹ Ena gadosisi tau monamonaune ana aiai mapuradi ena hatahata eai se beu bena i abidi i aidi: hinage kedewa se laoma ia bonuna se ainamosidi.

²² Tau awaawanori wa abo ie mate, aneru ia abo se laei Aberahama nuapouna eai se tore; eo tau monamonaune hinage ie mate, ia abo se tore.

²³ Hade eai i amamna, matana i tusaei Aberahama ie ita eda lohaloha eai, eo Lasaro ia nuapouna eai.

²⁴ I eogolau i ene, “Tamagu e, Aberahama e, u nuatoatoaegu, Lasaro u hetamariama bena nima

gigina i hedatu goila eai memenagu abo i hebuta: paana eau oeagi alaalasina eai ta, eo ea amamna.’

²⁵ Aberahama i ene, ‘Natugu e, u nuatuiyao em huia mauri eai wa em ginauri lolodi u abidio, eo Lasaro hinage ginauri baabaaeadi i abidi; huia ta ia amnana se lolo, oa amnam se baaea ariri.

²⁶ Hinage oa eo ai duaduarida eai ta duha lailai i otaesegai; ena headi hinage ina bena se laowa nige edi abalaowa; nei tupo eai hinage nige edi abalaoma.’

²⁷ Ia abo i ene, ‘Tamagu e, ea aibodaim ta ia bena u hetamari i lau tamagu ena numa eai:

²⁸ paana egu tataoyao ede haligigi; i heribakomakomanidi ata isi hinage abo se laoma amamna dimona eai ta.’

²⁹ Aberahama i ribalau ia arinai i ene, ‘Isi Mose eo peroveta tataodi se abidio: isi taba se ataiedi.’

³⁰ Ia i ene, ‘Tamagu e, Aberahama, nige’e: taba tau matemate esau i lau isi aridi eai, abo nuadi se buidi.’

³¹ Ie ribalau aridi eai, i ene, ‘Ena Mose eo peroveta nige se ataiedi, taba nige se ataiei hinage, ena taumatemate esau mate eai i torouio.’ ”

17

¹ Iesu abo i ribalau ena heaheatayao aridi eai, i ene, “Alabesibesi taba se laoma: ia tauhetubudi mo, kapore!

² I lolo we’u lailai ia gadona eai se au hepatulaei, ia abo se gabadobei gabogabo eai, ata merumeru gagirina esau hinage i healabesibesi.

³ Au komakomanimiu: ena em tau i hebaaeam, u guguiiai: ena nuana i bui ena baaea u nuatugabaedi.

⁴ Ena asubena esau ma haligigi-labui i hebaaeam, eo asubena esau ma haligigi-labui i uiowa, i ene, ‘Nuagu ea buiyao,’ ena baeaa u nuatugabaei.”

⁵ Aposotolo tataodi se ribalau Guiau arinai, si ene, “Guiiau e, ema sunuma u hemotulayama.”

⁶ Guiau i ene, “Taba emi sunuma doha sinapi tumana esau, omi abo au ribalau teina oeagi wa sukamine arinai au ene, ‘Se laahaim se umaim gabogabo eai’; abo hinage i awaabiemi.”

Parabole: heaheari.

⁷ “Eai arimiu eai, ena heaheari tauna tano i giari, e bulumakau i heaidi, ia oea eai i laoma abo au ribalau ia arinai au ene, ‘U lau, u bawabigabiga, u aiiai?’

⁸ Omi emi riba doha ina wa, au ene, ‘Agu aiiai u pei nonohai, em nogi u lio, u saguigu ea aiiai eo ea aiainom; e abotai abo u aiiai eo u ainom?’

⁹ Heaheari wa riba u lauhesom wa i abiwataidi, ia abo au lautoiei? Nuana nige’e.

¹⁰ Omi hinage, ginauri gamagaridi se lauhesommiu au ginauriheohidio, abo au ene ai heaheari baeamai: meta ama paisoa mo, arinai ai ginauri.”

Lepera tataodi saudoudoi se hemaauridi.

¹¹ Iesu abo i lau Ierusalem, Samaria eo Galilaia i baeawa duaduaridi eai.

¹² Eanua gagirina esau eai ie lage, lepera tataodi saudoudoi ia maedi se hailobai, isi se totoro eda lohaloha eai.

¹³ Se arina lailai, si ene, “Iesu e, tanuagamai e, u nuatoatoamai.”

14 Ia i itadi, abo i ribalau aridi eai, i ene, “Au lau au hemasarahauioimiu kohena aridi eai.” Ma laulaudi eda eai, abo se aa.

15 Esau aridi eai, ie ita i mauri, abo ie uio, i arina lailai arinai Eaubada i aihelahui.

16 Eo i gurisalaoba Iesu aena eai, i lautoi: ia Samaria tauna.

17 Iesu arinana i heuio i ene, “Tatao saudoudoi se heaadi e nige’e? Tatao haligigi-hasi wa haedi?”

18 Nige tau esau i uio bena Eaubada i aihelahui, teina laolaoma tauna mo.”

19 Ie ribalau ia arinai, i ene, “U torohai u lau em dobila wa u lauwaitai: em sunuma eai u mauri.”

Basileia ribana

Lk. 19.11, 12

20 Parisea tataodi ia se oimurini, si ene, “Eaubada ena basileia auiana abo i laoma,” arinadi i heuioidi, i ene. “Eaubada ena basileia nige i laoma masamasaraha:

21 hinage taba nige si ene, Ia ede ina! e ia ede nei! Paana Eaubada ena basileia omi nuaboemiu eai ede.”

Iesu ena loama helabuina ie ribanonohai

Deut. 30.3; A. adi H. 1.9-11

22 Ia i ribalau ena heaheatayao aridi eai, i ene, “Asubenadi abo se laoma, omi abo au henua ariri bena Tau Natuna ena asubena esega au ita, taba nige au ita.

23 Isi abo se ribalaowa arimiu eai, si ene, ‘Au ita ina: e au ita nei.’ tabu au lauwaitaidi, eo tabu au hemuriwaitaidi.

24 Doha namanamari galewa teha esau eai ie siri, i lau e teha esau eai: abo tau Natuna ena asubena eai ena abiabina doha meta.

²⁵ Na bagubaguna ia amamna gamagamagari i hearodi; teina isi ta hinage ia abo se nuagabaei.

²⁶ Doha Noa ena asubenadi wa, abo Tau Natuna hinage ena asubenadi nei doha.

²⁷ Isi se aiai, eo se aiainom, monediyao se tawa-soraidi, se hetahetawasora hinage, i lau e asubena wa Noa i awasae akina eai, dibori utuutu i lagema isi gamagaridi i earuhaidi.

²⁸ Lota ena asubena hinage doha; isi se aiai, eo se aiainom, se haiuneune, eo se uma, eo se abinuma.

²⁹ Nei asubenana ne Lota Sodoma i laugabaei oeagi alaalasi eo tano alaalasi galewa eai i taruma isi gamagaridi i unuhematedi.

³⁰ Nei asubenana tau Natuna se hemasaraha hinage meta doha.

³¹ Nei asubenana ne, tau numa ewa eai, ena gogo numa alo eai, taba nige i pesadobi i abihai i laei; eo tau hinage oea eai, taba nige i uio ena numa eai.

³² Lota monena au henuaisini.

³³ Ia ena mauri i abididini bena abo i mauri, ena mauri abo i tauyamui; ia ena mauri i nuagabaei ena mauri abo i abi.

³⁴⁻³⁵ Ea heribamiu ta, meta maionana eai ne tatao labui edi aba-eno esega arinai se eno, esau se abi, na esau se laugabaei. Sisine labui hinage *wheat* se girigiri, esau abo se abi na esau se laugabaei.”

³⁶⁻³⁷ Isi ia arinana se heuio, si ene, “Guiiau e, haedi eai?” I heribadi i ene, “Tau sinarena ena aba-ota eai, manu aiaitaudi nei eai abo se tupago-goesega.”

18

Parabole: tauhekiraino baaeana.

¹ Parabole esau i ribalau isi aridi eai aniona ede ina, tatao huia gamagamagari bena se lau-uura mo, tabu nuadi se beruberu;

²⁻³ i ene, “Eanua lailai esau eai tauhedudurai esau ie mia, Eaubada matausina nige i matausi, eo tatao hinage nige i nuatuidi. Sine wabuwabu esau eanua eai ne; i laoma ia arinai, i ene, ‘Agu waiunu u hemaisa.’

⁴ Ena riba bagubaguna nige i ataiei: abotai abo ia nuana eai, i ene, ‘Eaubada matausina nige ea matausi, eo tatao nige ea matausiedi;

⁵ taiede sine wabuwabu ta abo ea sagui paana i hemodeaririegu, ata huia gamagamagiri i laulau-daoima abo taugu si siololo.’ ”

⁶ Guiau abo i ene, “Tauhedudurai baabaeana ena riba au ataiei.

⁷ Eaubada ia enanayao abo i saguidi e nige’e, isi asubena to maiona se eogalau ia arinai, huia lohaloha edi riba sora nige i hemaisa?

⁸ Ea heribamiu ta, ea ’ne abo i saguiheueulaidi. Taiede, tau Natuna ena huia laoma eai sunuma abo i lobai tanoubu eai ta?”

Parabole: Parisea tauna eo telona tauna.

⁹ Teina parabole ta i ribalau tatao headi aridi eai isi si ene isi isibom se laulaududurai, eo tatao gamagaridi se isugaraedi:

¹⁰ “Tatao labui se awasae numa uura alona eai lau-uura hesabana; esau Parisea tauna, eo esau takisi tautano tauna.

¹¹ Parisea tauna wa i toro, i uurapasipasiei, i ene, ‘Eaubada e, ea lautoiem paana eau nige doha tatao gamagaridi, isi tauaigirihai, eo

taulaulaugewagewadi, eo tauganaganawari, eau hinage nige doha teina takisi tauna ta.

¹² Sabate esega ma labui ea aiaidabu, egu gogo gamagaridi ea peini peina saudoudoi, lausoisoina esega ea ainaiuae.

¹³ Na, takisi tautano wa i torosuara eaaawana, ia matana nige i tusaedi galewa eai, gabagabana eai ie oi, i ene, 'Eaubada e, eau tau baabaaeagu, u nuatoatoaegu.'

¹⁴ Ea heribamiu ta teina tau ta i dobiuio ena numa eai se taubigai, tau esau wa nige'e, paana tau esau iabom i hedebasaeuioi abo se heguri, eo tau esau iabom i hemerumeruioi abo se hede-basae."

Iesu merumeru gagiridi i helolodi

Mt. 19.13-15; Mk. 10.13-16

¹⁵ Bebe abo se ledima ia arinai bena i abiiyadi; ena heaheatayao se ita, abo se ribasuuidi.

¹⁶ Na, Iesu mo i eogaidi, i ene, "Merumeru gagiridi taba se laoma arigu eai, tabu au guduguidi: paana ede Eaubada ena basileia doha ede isi.

¹⁷ Mamohoi ea heribamiu ta, eai to eai Eaubada ena basileia nige i abi doha merumeru gagirina, taba nige i lusora alona eai."

¹⁸ Wasawasa esau i hesiolau ia arinai, i ene, "Tanuagagu lolona e, saha abo ea ginauri, mauri nige nosina abo ea abi?"

¹⁹ Iesu i ribalau ia arinai, i ene, Paana saha u ene eau ea lolo? Nige esau i lolo, esega dumaduma mo, Eaubada.

²⁰ Laugagaao ribadi u nuatuidio, Tabu u ganaganawari, tabu u aiainunu, tabu u aiayahari, tabu

u hegihegiru gaibu, tamam eo sinam u taubi-gaedi.”

²¹ Ia i ene, “Teina ginauridi gamagaridi ea sogo-hididinidio, ma hewarigu i laoma e huia ta.”

²² Na Iesu teina riba ta i ataiedi, i ribalau ia arinai, i ene, “Taiede, ginauri esega mo u hedeha, em gogo gamagaridi me u uneunedi, tatao gogogesagesa aridi eai u soiedi, em gogo ede abo u abi galewa eai: eo u laoma, u hemuri-wataiguma.”

²³ Teina riba ta i ataiei, ia abo i nuadubu ariri: paana ede ena une se gamagari ariri.

²⁴ Iesu tau wa i ita i nuadubu ariri abo i ene, “Isi taumonamonaune Eaubada ena basileia bena se lusora se hesabaasa!

²⁵ Kamela ie lusora mo diu gudana eai, taumonamonaune Eaubada ena basileia dobilana eai bena i lusora, abo i ahi.”

²⁶ Isi tatao teina riba ta se ataiei abo si ene, “Taba nei doha eai abo i mauri?”

²⁷ Ia i ene, “Ginauri wa tatao nige abidi se ata, Eaubada mo abidi ie ata.”

²⁸ Petero abo i ene, “Ai ginauri gamagaridi ai laugabaedio, ai hemuriwataim.”

²⁹ Iesu i ribalau aridi eai, i ene, “Mamohoi, ea heribamiau ta nige tau esau numa, e tamana, e sinana, e ena dodogayao, e monena, e nanatunayao i laugabaedi Eaubada ena basileia debana eai.

³⁰ Ia teina huia ta ginauri gamagaridi abo i abidi, eo maraitom asubena mauri nige nosina.”

Iesu ia matena eo torouiona i ribauio.

³¹ Saudoudoi-labui wa i woeaidima, ie ribalau aridi eai, i ene, “Ta sae Ierusalema eai, riba gama-garidi, tau Natuna ribana, peroveta se uridio abo se hemamohoiedi.

³² Paana ia abo se moselaei Murimuri-tataodi nimadi eai, ia abo se talatalawasiei, eo se hebaaeaaririei, eo se garigarisoi.

³³ Ia abo se lubilubini, eo se unuhemate: asubena hehaionana eai abo i torouio.”

³⁴ Teina riba ta nige se nuatulobaidi: riba wa i ribayamui, riba wa i ribaedi wa aniodi nige abina se ata.

Ieriko hanahanauna eai taumatagibugibu esau matana se helala

Mt. 20.29-34; Mk. 10.46-52

³⁵ Ia abo i laoma Ieriko i hanahanau, tau matag-ibugibu esau i bawabigabiga eda gegesina eai, ginauri i awaawanori.

³⁶ Moutuadi se laulau dagugudi i ataiei, i hesio, i ene, “Ina saha, wa?”

³⁷ Ia se heriba, si ene, “Iesu Nasareta i baeawa ie lau.”

³⁸ Ia abo ie eoga i ene, “Iesu, Davida natuna e, u nuatoatoaigu.”

³⁹ Isi se bagubaguna ia se ribasuui, si ene bena i monou: ia abo i eogalailai, i ene, “Oa Davida natuna e, u nuatoatoaigu!”

⁴⁰ Iesu abo i tarutoro, i lauhesomdi bena tau wa se woeaiyama: ia abo i laoma ia gegesina eai, i oimurini,

⁴¹ i ene, “Em nuatu saha abo ea sahaime?” Ia abo i ene, “Guiau e, bena matagu se lala.”

⁴² Iesu i ribalau ia arinai, i ene, “Matam se lalao: em sunuma debana eai u lolo.”

⁴³ Ma esega matana abo se lala, ia Iesu abo i lauwatai, Eaubada i hedebasaei; tatao gamagam-agaridi se ita, Eaubada se ailhelahui.

19

¹ Iesu i lulage Ieriko eai i baeawa ie lau.

² Tau esau esana Sakaio, ia takisi tau-tanogogo tanuagadi, tau monamonaune.

³ Ena gadosisi Iesu bena i ita: tatao se gamagari ariri nige ena abaitana, paana siarina ie kuu.

⁴ I aitautau baguna oeagi sukamoa eai i hinae Iesu bena abo i ita paana nei dobila eai ne arinai abo i baeawa.

⁵ Iesu ie lage wau dimo wa arinai, i sanalolosae tau wa ie ita, i ribalau ia arinai, i ene, “Sakaio e, u pesaheuheulama: wau ta em numa eai abo ea babawa.”

⁶ Ia i pesaheuheula, i woeaisaei ena numa eai ma kodena.

⁷ Isi abo se ita, gamagaridi se gadigadiguguei, si ene, “Ia i lau tau baabaeana i aitaumania.”

⁸ Sakaio i toro, i ribalau Guiau arinai, i ene, “Guiiau e, egu gogo tupona abo ea mosei tatao gogogesagesa aridi eai: eo ena ginauri aisana ea abigaibuidi hari tau, hari tau, aridi eai ea boraidi, abo ea hemaisauioidi, ma hasi maisana ea helai.”

⁹ Iesu i ribalau ia arinai, i ene, “Teina asubena ta mauri i lage teina numa eai ta, paana ia hinage Aberahama natuna esau.

¹⁰ Paana ede Tau Natuna i laoma tatao se tauyamu i eoidi, eo i hemauidi.”

Parabole pauna saudoudoi: eo basileia sora nige se hetubu

Lk. 17.21; A. adi H. 1.6-8

¹¹ Teina riba ta se ataiedi, parabole esau abo i heribadi, paana ia Ierusalem i hanahanau, eo isi edi nuatu hinage si ene, Eaubada ena basileia nige baeaona abo se hemasaraha.

¹² Arinai i ene, “Wasawasa esau i lau eanua esau eda lohaloha eai ena basileia esau bena i abi, eo i uioma.

¹³ Ena heaheari tataodi saudoudoi i eogaidima, moni pauna saudoudoi i mosedi, i ribalau isi aridi eai, i ene, ‘Au hepaisoaei i lau e ea uioma.’

¹⁴ Ena eanua tataodi ia se ouyalayalaei, riba esau se laei ia arinai, si ene, ‘Tau ta nige ai henua ia ama tanuaga.’

¹⁵ Ia i uioma, basileia wa i abiyao, tatao, abo i lauhesomdi heaheari tataodi se eogaidima ia arinai, isi wa moni i mosedi wa, isi se uneune bena i itadi moni hisa se hetubudi.

¹⁶ Tau baguna i laoma, i ene, ‘Guiau e, em pauna esega i hemala pauna saudoudoi.’

¹⁷ I ribalau ia arinai i ene, ‘I lolo ariri, oa heaheari lolona: em nuatu se dudurai, ginauri hisahisawaidi mo u komakomanidi, abo ea hetorom eanua saudoudoi oa tanuagadi eai u lau.’

¹⁸ Heaheari helabuina wa i laoma, i ene, ‘Guiau e, em pauna esega i hemala pauna haligigi.’

¹⁹ Hinage ia arinai i ene, ‘Oa abo se hetorom eanua haligigi tanuagadi eai u lau.’

²⁰ Heaheari esau wa i laoma, i ene, ‘Guiau e, hage u ita em pauna meta: ea suma komakomani, ea totore ie ota;

²¹ paana ea matausiem oa tau isuisupunapunana: eo em laulau enam u abigaibuidi mo, eo ginauri bena u tanogogoidi sora nige u lauhesuru.’

²² I ribalau ia arinai, i ene, ‘Oa heaheari tauna

baaeana, oa awam eai abo ea hegirum. U nua-tui eau tau isuisupunapunana, eo ginauri ea abi gaibuidi, eo ea tanotanogogo sora nige ea hesuru.

²³ Ie saha egu moni nige ue tore bank eai, ea uioma abo egu moni ea abi, eo hagahagadi hinage?’

²⁴ Isi ia gegesina eai tau totoro i ribalau aridi eai, i ene, ‘Pauna esega wa au abi, abo au mosei tau wa pauna saudoudoi tau abina arinai.’

²⁵ (Isi se ribalau ia arinai, si ene, ‘Guiiau e, ia pauna saudoudoi i abidio.’)

²⁶ Paana ea heribamiu ta eai to eai enana ie abi, enana hinage abo se mosei: eai to eai nige ie abi enana begana abo se laeudoiei.

²⁷ Na isi, agu waiunuyao nige se henua eau bena tanuagadi, au woeaidima, au unuidi matagu eai.’ ”

²⁸ Ia i ribalau ina doha, abo i bagubagunaedi, se sae Ieruselema eai.

²⁹ Betepage eo Betania i hanahanauidi, tupi esau esana Oliveta arinai se lage, ena heaheatayao labui i hetamaridi.

³⁰ I ene, “Au lau eanua matamiu eai, au lage arinai asini natuna se hedai au ita, sora nige tau esau i bawasae arinai, abo au eairihai, au woeaiama.

³¹ Ena tau esau i hesiowa, i ene, ‘Paana saha asini ne au eairihai?’ abo au riba ina doha, au ene, ‘Paana Guiiau bena i abi.’ ”

³² Isi se hetamaridi wa abo se lau, hinage se ita doha ena riba i ribaei.

³³ Asini natuna daina bena se earihai, tanua-gana se ribalau aridi eai, si ene, “Asini natuna me sahana au eairihai?”

³⁴ Si ene, “Guiiau bena i abi.”

35 Abo se woeai se laei Iesu arinai, adi lulu se toresae asini natuna potana eai; abo Iesu se hebawasae potana eai.

36 Ia ma launa adi lulu se lauwesteauri dobila eai.

37 Ia i lage hanahanau, Oliveta tupina abaleta-dobina eai, ena heaheatayao moutuadi gamagamagari se kode, eo se arina lailai Eaubada se aihelahui, paana ana paisoa gigiboridi se itadio;

38 si ene, “Wasawasa i lolo, ia i laoma Guiiau esana eai: loni galewa eai, ma ana tepo i mia iniini puripurina eai!”

39 Parisea tataodi headi moutuana boeadi eai se ribalau ia arinai si ene, “Tanuagamai e, em heaheatayao u ribasuuidi.”

40 Ia arinadi i heuio, i ribalau aridi eai, i ene, “Ea heribamiu ta ena tatao ta se monomonou ta, weu ma esega abo se eabayabalaoma.”

Iesu Ierusalem sabina ie dou

Lk. 13.34-35

41 Ia abo i lage hanahanau, eanua wa i ita, sabina ie dou.

42 I ene, “Oa, ena oa u nuatui, teina em asubena ta ginauri se patulaoma em loni arinai! wau ta matam eai se tauyamiu.

43 Paana asubena abo u hearodi, em waiunu hua lohaloha abo se sara hetaiirim, hari teha, hari teha se guduguduim, nige em abalulage.

44 Se heasibuim, u hemalagonu, eo nanatumyao boeam eai hinage; nige we’u esau abo i ota we’u esau potana eai paana egu lagema huiana nige au nuatui.”

Dubu lailai se heaa ma helabuina

Mt. 21.12-16; Mk. 11.15-18; Io. 2.13-17

⁴⁵ Ia abo i awasae numa uura alona eai, isi tau-uneunelau eo tauuneunelaoma nei eai i aiduiedi.

⁴⁶ I ribalau aridi eai, i ene, “Se uriyao, egu numa abauura ede: omi numa wa au abi i hemala tauaiyahari edi abamia.”

⁴⁷ Asubena gamagamagari i lauheata numa uura eai: kohena lailaidi eo tauuriuri tataodi eo eanua babadadi ia se eooi bena se unui.

⁴⁸ Edi nuatu si eooasa; paana tatao gamagaridi ena riba se gadosisiedi.

20

¹ Nei asubena ne esau tatao i lauheataedi numa uura eai eo evanelia hinage i lauguguiaidi, kohena lailaidi eo tauuriuri tataodi babadayao maedi se laoma ia arinai.

² Se ribalau ia arinai, si ene, “U heribamai, teina ginauridi ta eai ena gigibori eai u ginauridi wa? E eai gigibori ta i leawa?”

³ Arinadi i heuio, i ribalau aridi eai, i ene, “Riba esau hinage abo ea hesioimiu: abo omi au herib-aguma:

⁴ Ioane ena bapatiso galewa eai i laoma wa, e tatao aridi eai ie tubuma?”

⁵ Isi se heunaboisaha si ene, “Ita ta 'ne, Galewa eai i laoma; ia abo i ene, 'Ie saha ia nige au ataiei?”

⁶ Na, ita ta 'ne, “Tatao aridi eai ie tubuma’: tatao gamagamagari abo se lauwe’uida: paana isi se nuatuiyao Ioane ia peroveta mamohoi ede.”

⁷ Arinana abo se heuio si ene, “Ena abalaoma nige abina ai ata.”

⁸ Iesu i ribalau aridi eai i ene, “Eau hinage nige ea heribamiu eai ena gigibori eai teina ginauri ta ea ginauridi.”

Parabole: vine oeana
Mt. 21.33-46; Mk. 12.1-12; Is. 5.1-7

⁹ Ina parabole ta abo tatao i heribadi; “Tau esau vine oeana i umai: i mosei tautaitawata aridi eai, abo i lau eanua eda lohaloha eai, huia lohaloha ie mia.

¹⁰ Ena huia buina ena heaheari esau i hetamari ie lau tautaitawata aridi eai, vine oeana aiaina bena se mosei ia arinai; tautaitawata tau wa se laulaulubini; ia se hetamari ma nima ahaahana.

¹¹ Abotai abo heaheari esau i hetamari: ia hinage se laulaulubini, eo edi abi se baaea ariri ia arinai, ia se hetamari ma nima ahaahana.

¹² Abotai abo heaheari hehaionana wa i hetamari; ia hinage abo se unui: eo se heduiahalai.

¹³ Vine oeana tanuagana i ene, ‘Abo ea saha? Natuyogoyogoigu ta ea gadosisiaririei abo ea hetamari: nuana ia se ita abo se heasisiei.’

¹⁴ Tautaitawata ia se ita, se oioiriba, si ene, ‘Tanuaga ede teina: ehei! ia ta unui, oea ta abo ta abi itabom eda oea.’

¹⁵ Arinai vine oeana eai ia se heduiahalai, eo se unuhemate. Vine oeana tanuagana tatao wa ia abo edoha ena abiabidi?

¹⁶ Ia abo i laoma oea tautaitawataina wa abo i unuhematedi, vine oeana abo i mosei hari tatao aridi eai.” Isi riba ta se ataiei abo si ene, “Eaubada taba nige meta doha!”

¹⁷ Ia i itadi, i ene, “Ina riba ta saha se uriyao si ene, ‘We’u wa numa tauabina se gabaei, iaede i hemala we’u tubeina eai i lau.’

¹⁸ Tau esau eo esau i beu teina we’u ta potana eai abo i tamogorugoru; ia we’u wa i beu potana eai, ia abo i hemala ahu.”

Telona monina ribana

Mt. 22.15-22; Mk. 12.13-17

¹⁹ Nei huiana eai ne kohena lailaidi eo tauuriuri tataodi edi dobila se eooi bena ia se abilau nimadi eai: tatao mo se matausiedi; paana se itayao teina parable ta i ribaei wa arinai i hegirudi.

²⁰ Isi ia se itaitasipoi tauwesewese se hetamaridi se lau se boraborai, si ene bena isi tau laulaududurai tataodi, bena riba se hepilipili ia abo se mose-laei gavana nimana gigiborina eai.

²¹ Isi ia se oimurini, si ene, “Tanuagamai e, ai nuatui oa em riba eo em lauheata se dudurai, hinage nige tau esau u heasisinapai, Eaubada ena dobila tatao u heatamamohoiedi.

²² Laugagaeo i ene saha, i dudurai Kaisara takisi monina ta mosei, e nige’e?”

²³ Edi borabora i italobaidio, ie ribalau aridi eai i ene, “Aue saha au nohoigu ta?”

²⁴ Hage denari esega au heitagu. Eai ana ao, eo eai ena uriuri ede meta?” Arinana se heuio, si ene, “Kaisara enana.”

²⁵ Abo i ribalau aridi eai, i ene “Kaisara ena ginauri au laei Kaisara arinai, eo ena Eaubada ena ginauri au laei Eaubada arinai.”

Iesu Sadukea tataodi torouio ribana i heribadi

Mt. 22.23-33; Mk. 12.18-27

²⁶ Ena riba nige se hepilipilidi tatao matadi eai: ena riba se noonoei: nige ariarinadi.

²⁷ Sadukea tataodi headi abo se laoma ia arinai, edi nuatu si ene, tatao nige mate eai se torouio, ia se oimurini

²⁸ si ene, “Tanuagamai e, Mose ena uriuri arimai eai i ene, tau esau, ena dogo i tawasoraio ie mate

nige nanatunayao, ena doga abo ena wabu i hai tumadiyao abo i hetubudi ena doga wa enana.

²⁹ Boga esau tataodi haligigilabui, taubaguna i tawasora, ie mate, nige natuna.

³⁰ Helabuina hinage sine wa ie hai, ia hinage ie mate eo nige natuna.

³¹ Hahaionana hinage sine wa ia abo ie hai; hehaligigi-labui edi laulau nei doha mo: gama-garidi se mate, nige nanatudiyao.

³² Abotai abo hinage sine wa ie mate.

³³ Torouio huiana sine wa eai abo monena? tatao haligigi-labui ia se hai.”

³⁴ Iesu arinadi i heuioidi, i ribalau aridi eai i ene, “Ina tanoubu tataodi se tawasora, eo se hetahetawasoraedi.

³⁵ Isi si ene se lolo bena nei huia ne abo se hearo, eo mate eai se hetorouioidi, taba nige se tawasora, eo hinage nige se hetahetawasora:

³⁶ hinage taba nige se mateuio paana isi eo aneru gonogonoadi; isi Eaubada nanatunayao, eo torouio nanatunayao.

³⁷ Taumatemate abo se torouio wa, Mose oeagi gagirina eai i hemasarahayama, Guiau esana i ribaei Aberahama ena Eaubada, eo Isaako ena Eaubada, eo Iakobo ena Eaubada.

³⁸ Paana ia nige taumatemate edi Eaubada: na taumaumauri mo isi edi Eaubada: paana tatao gamagamagari ia debana eai se mauri.”

Iesu i hesiolau tauuriuri aridi eai

Mt. 22.41-46; Mk. 12.35-37

³⁹ Tauuriuri tataodi headi ia arinana se heuio si ene, “Tanuagamai e, em riba se lolo.”

⁴⁰ Arinai abo se hesiolautom, nige se oimuriuio.

⁴¹ Ie ribalau aridi eai, i ene, “Ie saha si ene Keriso ia Davida natuna?”

⁴² Wana bukana eai Davida hinage i ene, ‘Guiiau i ribalau egu Guiiau arinai, i ene, U bawabigabiga nima-tutugu eai.

⁴³ I lau e am waiunuyao ea heterodi abo se hemala aem adi bou.’

⁴⁴ Davida ia i awaguiawei, ie saha ia natuna?”

⁴⁵ Tatao gamagamagari matadi eai i ribalau ena heaheatayao aridi eai,

⁴⁶ i ene, “Tauuriuri au komakomanidi, edi gadosisi mo lulu lohaloha se tautausiedi, eo abauneune eai bena tatao abo se laulautoiedi; eo sunago eai abababawa saesaedi se henuadi, eo abamataasi eai biri saesaedi se henuadi hinage.

⁴⁷ Isi sisine wabuwabu edi numa se aigirihaidi, eo adi lulu se helohadi bena abo tatao se itadi: isi mate lailai abo se hearo.”

21

Sine wabuwabu ena ainauia

Mk. 12.41-44

¹ Iesu i sanalolosae tatao monamonaune i itadi edi ainauia se toretoredobi moni abapeiaurina eai.

² Eo sine wabuwabu esau hinage ie ita, pene gagiridi labui i toredobedi.

³ Ia i ene, “Mamohoi ea heribamiu ta, teina sine wabuwabuna ta nige ena gogo, enana i toredobedi i sae ariri, gamagaridi enadi wa i hemuridi.

⁴ Paana teina tatao gamagaridi edi gogo gamagaridi wa arinai edi ainauia se usadobedi begadi mo Eaubada se ainaui: wabuwabu

wa, ia gogogesagesa, ena moni maudoina i usadobei-esegaidi.”

Oliveta lauguguiaina

Mt. 24.25; Mk. 13

⁵Tatao headi numa uura ribana se oioiribaei, si ene, “We’u lolodi eai eo ainauia lolodi eai numa wa se hepasa,” ia i ene,

⁶“Teina ginauridi ta omi au itadi, asubenadi abo se lagema nige we’u esau i ota we’u esau potana eai, gamagaridi abo se heboloheohidi.”

⁷Isi ia se oimurini si ene, “Tanuagamai e, auiana teina ginauridi ta abo se tubu? Eo heiheinoidi saha abo se tubu hanahanaui?”

⁸Ia i ene, “Au komakomanipiu ata se boraimiu: paana gamagaridi abo se laoma esagu eai, si ene, ‘Eau Keriso ede’: ‘Huiana i hanahanauma!’ omi tabu au lauwataidi.

⁹Omi iala eo heasiworewore wasadi au ataiedi, tabu au matausi: paana teina ginauridi abo se tubu baguna: na sigasigana sora.”

¹⁰Ia abo i ribalau aridi eai i ene, “Eanua abo eanua esau se ialaidi: eo basileia abo basileia esau se ialaidi:

¹¹hari teha, hari teha eai moniinii lailaidi abo se tubu; eo guriam hinage: eo laumatemate: eo nuamatamatausi, eo heiheinoidi lailaidi galewa eai se laoma.

¹²Ina ginauri sora nige se tubu, omi abo se toabagunaimiu, eo se heamamnamiu, se mose-laemiu sunago eo numa tutugudu eai, eo se ni-urilaemiu wasawasa eo gavana matadi eai, eau esagu debana eai.

¹³Omi emi abaribahemasaraha huiana ede meta.

¹⁴ Nuamiu au headiriesegaidi, emi riba saha saha tabu au nuatunonohaidi:

¹⁵ paana awamiu sonogana abo ea lediwa, ami waiunu gamagaridi taba nige se heuio, eo taba nige se ribaheboso.

¹⁶ Omi tamamiu, sinamiu, eo emi dodogayao, eo ami bogao, eo ehamiuyao abo se moruimiu: omi headi hinage abo se unuhematemi.

¹⁷ Tatao gamagamagari abo se ouyalayalaemi e au esagu debana eai.

¹⁸ Na urumiu maiawadi taba nige esega se hebaaea.

¹⁹ Emi miatahitahi debana eai nuamiu abo se mauri.

Ierusalem a bo se hebaaea se ribanonohai.

²⁰ “Omi Ierusalem a u ita tauiala gamagamagari se hetaiiri, au nuatui sabom abo i hanahanau ede.

²¹ Nei huiana ne isi Iudea taumiaidi abo se dago oea tupidi eai: isi hinage oea wa boeana eai abo se dago murimuri eai: eo ealeba tataodi tabu se sae arinai.

²² Paana teina maisa baaea asubenadi, bena riba gamagaridi se uridio abo se hemamohoi.

²³ Nei asubenadi ne kapore sisine bogabogadi, eo isi hinage nanatudiyao se hemadodi! Paana oea eai wa abo baaea lailai se hearodi, eo ouiala-hinage teina tatao ta potadi eai i taru.

²⁴ Isi elepa matana eai abo se mate, eo se auauidi se niurilaedi eanua gamagamagaridi eai: Murimuri tataodi Ierusalem abo se utuututawatawai, i lau e Murimuri tataodi edi huia i lautom.

Guiau i uioma ma namanamarina

Mt. 24.29-31

²⁵ “Heiheinoidi abo se tubu mahana boeana eai, eo nawalai boeana eai, eo ipora boeadi eai; eo tanoubu eai ta eanua tataodi baaea se hearodi; eo aruadi se loi; hinage gabogabo eo butubutu se dagugu lailai;

²⁶ tatao nuadi abo se beruberu paana se matausi, eo paana ginauri wa se itadi se tubu tanoubu eai ta: galewa ginauridi abo se moimoiu.

²⁷ Tau Natuna abo se ita eada boeana eai i laoma ma gigiborina ma ana tepo, ma ana bela.

²⁸ Teina ginauridi se tubuma, au sanalolosae, urumiu au lausinidi; emi mauri i hanahanauma.”

Parabole: Kuhou

Mt. 24.32, 33; Mk. 13.28, 29

²⁹ Parabole esau i heribadi i ene, “Kuhou au ita, oeagi gamagaridi hinage;

³⁰ ena se ini omi au nuatui, au ene, siwaro abo i hanahanauma.

³¹ Hinage doha meta teina ginauri au itadi se laoma, au nuatui au ene Eaubada ena basileia i hanahanaumao.

³² Mamohoi ea heribamiu ta, teina isi ta taba nige i lautom, riba gamagaridi ta abo se hemamohojedi.

³³ Galewa eo tanoubu abo se lautom: egu riba taba nige edi abalautom.

Guiau abo i uioma aridi eai i ribanonohai

Mt. 24.34-51; Mk. 13.30-37

³⁴ “Au komakomanimiu, ata huia esau nuamiu se porohe, au aiadaoi, eo au nomnomdao, eo teina mauri ginauridi ta au nuanuatuidi, eo nei asubenana ne i lagema ata i hetagugumiu.

³⁵ Paana abo i laoma tatao gamagaridi tanoubu maudoudoina taumiaidi abo i sa'idi.

³⁶ Arinai au silasilawa, eo huia gamagamagari au lau-uura, omi abo si ene au lolo teina ginauridi ta abo se laoma au dagoedi, abo au totoro hinage tau Natuna matana eai.”

³⁷ Asubena i lauheata numa uura alona eai: maiona ie pesa, oea esau arinai ie mia oea wa esana ede Oliveta.

³⁸ Mara-ie-tom tatao gamagamagari se lau ia arinai numa uura alona eai, ia arinana bena se ataiei.

22

Iuda i ene Iesu abo i morui

Mt. 26.2, 14, 15; Mk. 14.1, 2, 10, 11

¹ Areto Nige ie Sese mataasina i hanahanau, esana ede Pasova.

² Kohena lailaidi tataodi, eo tauuriuri tataodi, ana mata se eoi ia bena se unui: tatao mo se matausiedi.

³ Satani Iuda, esana esau Isakariota, abo i lui, ia saudoudoi-labui wa esau.

⁴ Ia i lau dobila eai kohena lailaidi eo kapena maedi se ribariba, Iesu edoha ena abiabina abo i morui eo i mosei isi aridi eai.

⁵ Isi nuadi se lolo, eo se oioiriba moni abo se mosei ia arinai.

⁶ Ia i heribanonohaidi ena dobila i woeai aisana, bena i moruiyamui, tatao wa nige se ita.

Pasova se abinonohai

Mt. 26.17-19; Mk. 14.12-16

⁷ Areto Nige i Sese asubenana i lagemu, pasova arinai bena se unui.

⁸ Ia Petero eo Ioane i hetamaridi, i ene, “Au lau, pasova au abinonohai, abo ta ai.”

⁹ Isi se ribalau ia arinai, si ene, “Haedi abo ai abinonohai?”

¹⁰ I heribadi, i ene, “Ena au lulage eanua eai, tau esau abo au hailobai, goila siaki eai i bahei: ia au lauwtai numa ena abaawasae eai hinage au awasae.

¹¹ Numa wa tanuagana abo au heriba, au ene, “Tanuagada i heribam, i ene, Taumana edi biri haedi, arinai pasova ea ai, ma egu heaheatayao?”

¹² Ia abo biri lailai ewa eai i heitamiu se peinonohao: metai au abinonohai.”

¹³ Isi se lau, hinage se lobai doha wau i ribaei wa: pasova abo se abinonohai.

¹⁴ Huiana ie lage, ia i bawabigabiga, eo aposo-
tolo saudoudoi-labui maenayao.

¹⁵ I ribalau aridi eai, i ene, “Egu gadosisi lailai ede ina maeguyao omi pasova ta ai baguna, abo ea amamna:

¹⁶ paana ede ea heribamiu ta, pasova ta taba nige ea ai uiui, i lau e abo se hemamohoei Eaubada ena basileia eai.”

¹⁷ Kaputi i abi, abo i lautoi, i ene, “Teina au abi, ami au soi:

¹⁸ Ea heribamiu ta, vine masina taba nige ea nomuiui, i lau e Eaubada ena basileia i lagema.”

*Mataasi tabuna se hetubu
Mt. 26.26-29; Mk. 14.22-25*

¹⁹ Areto ie abi, i lautoi, abo i ihi, i mosei aridi eai, i ene, “Taugu ede teina se leawa au abi, arinai emi abahenuaisinigu.”

²⁰ Se aiai lautom abo kaputi hinage ie abi, i ene, “Teina kaputi ta gagaao harihariuna osinagu eai, se heboriri debamiu eai.

Iesu tau moruina i ribaei

Mt. 26.21-25; Mk. 14.18-21; Io. 13.18-30

²¹ “Na, ia abo i moruigu, maegu nimana ie tore hatahata potana eai ta.

²² Mamohoi tau Natuna abo i lau doha se nuatui nonohai: kapore nei tau ne ia i morui ne!”

²³ Isibom se hesihesiouioidi si ene aitea tau aridi eai abo i abi doha nei.

Se lulu, si ene eai aridi eai abo i sae

Mt. 20.25-28; Mk. 10.42-45

²⁴ Hinage isibom se haiawayagara, aitea aridi eai abo i saeariri.

²⁵ I ribalau aridi eai i ene, “Murimuri tataodi edi wasawasa se lauhearidi, eo isi tatao se lauh-esomdi, esadi se tore tatao tauhelolodi.

²⁶ Na, omi tabu meta doha: esau arimiu eai i sae ia abo i hemala taumurita: eo ia se awaguauei, abo i hemala tauheaheari.

²⁷ Aitea i sae ariri ede, ia abo i bawabigabiga i aiai, e ia abo heaeai tauabina? Ia i bawabigabiga i aiai, e nige’e? Na eau arimiu eai doha heaheari tauna.

²⁸ “Agu noho ea hearodi omi ede au miatahitahi arigu eai.

²⁹ Basileia esau abo au abi enamiu: doha hinage Tamagu i leama enagu;

³⁰ egu basileia eai, egu hatahata eai abo au aiai, eo au aiainom, eo abo au bawabigabiga terona potadi eai Isaraela bogadi saudoudoi-labui abo au heduduraidi.”

*Petero Iesu i uharaei se ribanonohai**Mt. 26.33-35; Mk. 14.29-31*

³¹ Guiau abo i ene, “Simona e, Simona e, Satani i henua ariri bena i abim, bena i oiluiluim doha sitona.

³² Na ea lau-uurao enam, bena em sunuma tabu i lautom: oa nuam u bui, em dodogayao abo u headidiridi.”

³³ I ribalau ia arinai, i ene, “Guiiau e, eau abo ea lau wataim, ta lau numa masigiri eai, eo ta mate.”

³⁴ I ene, “Petero e, ea heribam ta, teina wau ta kamkam sora nige ie dou, oa ma haiona abo u uharaegu, abo u ene nige abigu u ata.”

Tauheaheata hari baaea, hari baaea, abo se hearodi, i heribadi.

³⁵ Iesu i ribalau aridi eai, i ene, “Nabada wa ea hetamarimiu wa, nige moni tobona, eo nige tobo, eo nige ae’um, ginauri esau au hedeha?” Isi si ene, “Nige’e.”

³⁶ Abo i ribalau aridi eai, i ene, “Teina huia ta ia taba moni tobona i abi abo i abi, eo lau wasi tobona hinage: ia hinage nige ena elepa, ena lulu i uneunei, abo ena elepa ena abaabina.

³⁷ Paana ea heribamiu ta, ea ’ne, teina ta se uriyao debagu eai abo se hemamohoei, si ene, ‘Laugagaeo tauutuutusina maedi se heoiesegai,’ paana ede saha enagu si uri, abo se hemamohoei.”

³⁸ Isi si ene, “Guiiau e, hage u ita elepa labui ede ina.” I ribalau aridi eai, i ene, “Gonoana.”

*Iesu oea eai**Mt. 26.36-46; Mk. 14.32-42*

³⁹ Ia ie pesa ie lau Oliveta tupina eai, doha ia kamanina; ena heaheatayao ia se hemuriwatai.

⁴⁰ Ie lage dimona eai, i ribalau aridi eai, i ene, “Au lau-uura, ata noho se hearomiu.”

⁴¹ Ia i lausuara siuna lohana doha we’u ta tu, i turibono, i lau-uura.

⁴² I ene, “Tamagu e, ena nuam u ene i lolo, teina kaputi ta u laehesuara: Taiede eau nuagu nige’e, oa mo nuam ta abi.”

⁴³ Aneru esau galewa eai i lagema ia arinai, ia i headidiri.

⁴⁴ Ia amamna lailai i nuhuri ena uura i uura adidiri: i muiasa doha osina i namtutu lailai dobi tano eai.

⁴⁵ I lau-uura nonoha abo i toro, eo ie lau ena heaheatayao aridi eai i lobaidi ma enodi, paana se nuadubu ariri.

⁴⁶ I ribalau aridi eai, i ene, “Saha au enoi? Au toro au uura, noho ata i hearomiu.”

Iuda Iesu i morui

Mt. 26.47-56; Mk. 14.43-50; Io. 18.3-11

⁴⁷ Ia ma ribaribana na tatao moutuana se lage-lage, tau wa esana se tore Iuda, saudoudoi-labui wa esau, i eda-bagubagunaedi, i lau e Iesu gegesina eai ia bena i alagoiei.

⁴⁸ Na Iesu i ribalau ia arinai, i ene, “Iuda e, Tau Natuna em alagoi ta arinai u morui?”

⁴⁹ Isi se torogogo ia gegesina eai tatao edi nuatu se itayao, se ribalau Iesu arinai si ene, “Guiau e elepa eai ai lauelepai wa?”

⁵⁰ Tau esau aridi eai, kohena lailai ena heaheari tauna i lauelepai, ia bea tutuna i sapihai.

⁵¹ Iesu arinadi i heuio, i ene, “Besi!” Ia beana i abiitalaei eo i hemaui.

⁵² Iesu abo i ribalau kohena lailaidi, eo numa uura kapenadi, eo babadadi aridi eai, isi ede se

laoma ia arinai, i ene, “Au laoma, ma elepamiu eo ma alahiamiu, doha eau tauaiayahari?”

⁵³ Asubena gamagamagari eau maemiua numa uura alona eai, nimamiu nige au heleleama arigu eai: emi huia ede ina ta, eo masigiri gigiborina hinage.”

Iesu se toai: Petero i halele

Mt. 26.57, 69-75; Mk. 14.53, 54, 66-72; Io. 18.12, 15-18, 25-27

⁵⁴ Isi ia abo se woeai, se laei, kohena lailai ena numa eai se lage. Na Petero isi muriariridi eai i laolaoma.

⁵⁵ Isi oeagi se iuhi numa lailai alona eai, eo se bawagogo, Petero hinage maedi se bawa.

⁵⁶ Sine esau ia ie ita, oeagi gegesina eai ie bawa wa, i itaitasipoilaei, eo i ene, “Teina tau ta ia hinage maena.”

⁵⁷ Ia abo i halele, i ene, “Sine e, ia nige ea itaitai.”

⁵⁸ Nige baeona abo tau esau hinage ia ie ita, eo i ene, “Oa hinage adi sagu esau.” Petero abo i ene, “Tau e, eau nige’e.”

⁵⁹ I lau e, doha mahana esega, tau esau hinage i riba adidirilau, i ene, “Mamohoi ina tau ta ia hinage maena: ia Galilaia tauna.”

⁶⁰ Petero abo i ene, “Tau e, em riba me ea hekau.” Ma esega abo, ma ribaribana, na kamkam ie dou.

⁶¹ Guiau abo i sinibui, i italau Petero arinai. Petero Guiau ena riba wa abo i henuaisini, doha i ribalau ia arinai, i ene, “Kamkam sora nige ie dou, oa ma haiona abo u halelegu.”

⁶² Petero abo ie pesa murimuri eai, ie dou ma gado kalapina.

*Iesu se lubilubini**Mt. 26.67-68; Mk. 14.65; Io. 18.22-23*

⁶³ Tatao wa Iesu se abididini ia se talatalawasiei, eo se laulauwapai.

⁶⁴ Isi ia matana abo se suma, pareana se wa'i, ia se oimurini, si ene, "U riba peroveta, eai i lubilubim?"

⁶⁵ Eo riba baaea gamagamagari hinage ia arinai se hebaaea.

*Iesu i lau sunederi matadi eai**Mt. 26.59-68; Mk. 14.55-65; Io. 18.19-24*

⁶⁶ Mara-ie-tom, tatao babadadi, eo kohena lailaidi, eo tauuriuri tataodi hinage se oigogo esega, ia se woelaei edi sunederi alona eai, si ene,

⁶⁷ "Oa Keriso ede? Hage u heribamai." I ribalau aridi eai, i ene, "Taba ea heribamiu, nige au ataiei:

⁶⁸ ena ea hesioemiu hinage arinagu taba nige au heuioyama, eo taba nige au eairihaigu.

⁶⁹ Maraitom asubena Tau Natuna abo i bawabigabiga Eaubada ena gigibori nima tutuna eai."

⁷⁰ Isi gamagaridi abo si ene, "Oa Eaubada Natuna ede?" I ribalau aridi eai, i ene, "Au ene eau ede."

⁷¹ Isi si ene, "Mata esau abo ta eooi? Iabom awana eai ena riba ta ataieiyao."

23*Iesu se laei Pilato matana eai**Mt. 27.2, 11-14; Mk. 15.1-5; Io. 18.28-38*

¹ Isi moutuana se ohiaiesega se torohai Iesu se woelaei Pilato arinai.

² Isi ia se hegiru, si ene, "Tau ta ai lobai ema eanua tataodi i hegegaridi, eo i heribadi, i ene,

tabu Kaisara enana se mosei, eo hinage i ene, iabom mo Keriso ede, ia Wasawasa.”

³ Pilato ia i oimurini, i ene, “Oa Iudea edi Wasawasa?” Iesu ia arinana i heuio, i ene, “Oa u ene doha meta.”

⁴ Pilato abo i ribalau kohena lailaidi, eo tatao aridi eai, i ene, “Teina tau ta ena baaea nige ea lobai.”

⁵ Isi abo se ouialaiala ariri, si ene, “Eanua tataodi i heasiworeworedi. Galilaia i lauheata hetubu, eo eanua gamagamagari i laoma hinage ina eanua eai ta.”

Iesu se hetamari Heroda matana eai.

⁶ Galilaia esana se atai, Pilato i ataiei, abo i hesio aridi eai, i ene, “Tau ta Galilaia tauna?”

⁷ Abo i nuatui Iesu Heroda ena tupo eai i laoma, arinai i hetamari Heroda arinai, Heroda wa nei huiana ne Ierusalem eai.

⁸ Heroda Iesu ie ita nuana i lolo ariri: nabada wa ena gadosisi bena ia i ita, paana ia wasana gamagaridi i ataiedio; eo ena nuatu i ene bena ena laulau gigibori esau abo i ita.

⁹ Riba gamagamagari aridi eai i hesiolau Iesu arinai: ia arinana nige i heuio.

¹⁰ Kohena lailaidi eo tauuriuri tataodi se toro ia se hegihegirudaoui.

¹¹ Heroda, ma ena iala tataodi ia se isugaraei, eo se talatalawasiei, eo lulu balebalelemna esau ia se helui, ia abo se hetamari uio Pilato arinai.

¹² Nei asubenana ne Pilato eo Heroda se awahe-riam, nabada wa taudi labui se heiheisugara.

Iesu i uio Pilato matana eai: Baraba se eairigabaei, Iesu se awamatei

Mt. 27.15-26; Mk. 15.6-15; Io. 18.39-40

13 Pilato, kohena lailaidi eo babadadi eo eanua tataodi i eogagogoidi,

14 abo i ribalau aridi eai, i ene, “Ina tau ta au woeaiama arigu eai ta, au ene tatao i hegege-waridi: ia matamiu eai ana mata ea eoodadaasa eai, riba wa emi abahegiruna wa ina tau ta nige baaeana saha ea lobai:

15 nige’e, hinage Heroda nige i lobai: paana ede ea hetamarimiu Heroda arinai; nige mate laulauna esau i laulauei.

16 Ia abo ea lubilubini, eo ea eairigabaei.”

17 (Mataasi huiadi eai ne kamanidi, tau esau se eairigabaei.)

18 Ma esega se eogayogalau, si ene, “Ina tau ta au abiyawa, na Baraba au eairigabaeyama arimai eai.”

19 (Tau ta eanua i heasibuibuidi, eo i aiaiunu, arinai ia se tore numa masigiri eai.)

20 Pilato, bena Iesu i eairigabaeuioi, arinai i riba uio aridi eai.

21 Na isi abo se eogayoga, si ene, “Ia au hesatauroeawa, ia au hesatauroeawa!”

22 Ma haiona hinage i ribalau aridi eai, i ene, “Ie saha, baaea esana ie abi? Ena mate paana nige ea lobai: abo ea lubilubini, eo ea eairigabaei.”

23 Se samadudui ma arina lailaidi si ene ia bena se hesatauro. Isi arinadi eo kohena lailai arinadi abo se hebigawatai.

24 Pilato abo i heribadi isibom edi nuatu abo se abiyawa.

25 Tau wa se tore numa masigiri eai paana tatao i heasibuibuidi eo i aiunu wa i eairigabaei, isi edi gadosisi wa i lauwaitai: Iesu i moselaei edi samadudu eai wa.

²⁶ Isi Iesu se woealaei, Kurene tauna esau esana Simona se toai, ealeba eai i laolaoma, satauro se toresae ia dabaeirona eai, bena i bahei Iesu murina eai i laulauwatai.

Iesu se hesatauro

Mt. 27.33-38; Mk. 15.22-28; Io. 19.17-19

²⁷ Tatao peledi lailai ia se lauwatai, eo sisine, isi hinage ia se doudoui, eo se laulaukaporei.

²⁸ Na Iesu i torobui aridi eai, i ene, “Jerusalema nanatunayao sisine e, tabu au doudouigu, omibom au doudouiuoimiu, eo nanatumiuyao au doudouidi.

²⁹ Na asubenadi abo se lagema aridi eai abo si ene, ‘Isi sisine se agaagari, eo nige se haihaisu, eo susudi nige se hemahemadoedi, se lolo ede.’

³⁰ Isi abo se ribahetubu oea tupidi aridi eai, si ene, ‘Au buima potamai eai’; eo oea tupi gagiridi aridi eai abo si ene, ‘Au bubulitawaimai.’

³¹ Paana ena teina ginauridi ta se ginauridi oeagi idaidaina eai, saha abo se abi oeagi kokoiagina eai?”

³² Tatao baaea labui hinage ia maenayao se woeaesegaidi se laedi bena se unuidi.

³³ Isi se lage dimo wa arinai, ia ede esana se tore Moiyaru, metai ia abo se hesatauro tatao baaea labui wa maenayao, esau ia nima tutuna eai, eo esau ia nima seuseurina eai.

³⁴ Iesu abo i ene, “Tamagu e, edi baaea ta u nuatugabaei; edi abiabi ta nige abina se ata.” Ana lulu se soi: kelero eai se ginauri.

³⁵ Tatao wa se totoro se itaitalau. Tanuagayao hinage maedi ia se liuliuaei, si ene, “Hari tatao mo i hemaauridi: ena ia Keriso, Eaubada i hineri, taba iabom mo i hemaauriuoi.”

36 Iala tataodi ia hinage se liuliuaei, se laoma ia arinai vinega se helelesae arinai.

37 Eo si ene, “Ena oa Iudea edi wasawasa oabom u hemauiuiioim.”

38 Uriuri esau hinage se urisae ia potana eai, Heleni, eo Roma, eo Heberu arinadi, si ene, “IA EDE TEINA TA IUDEA EDI WASAWASA.”

Tau aiyahari nuana i bui

Mt. 27.44; Mk. 15.32

39 Tau baaea esau wa, se heabasi wa, Iesu i riba baaeaei, i ene, “Ena oa Keriso u hemauiuiioim, eo ai taumai labui hinage u hemauiuiioim.”

40 Ana sagu wa arinana i heuio i ribasuui, i ene, “Eaubada nige u matausiei, eda mate esega ta hearo ta?”

41 Ita ta mate i lolo; eda laulau maisana ia ede: teina tau ta nige ena baaea.”

42 I ribalau Iesu arinai, i ene, “Guiiau e, oa u laoma em basileia u abi abo u nuatuigu.”

43 Iesu i ribalau ia arinai, i ene, “Mamohoi, ea ribalaowa arim eai, wau ta oa abo maegu paradaiso eai.”

44 Huia wa doha mahana haligigi-esegana, eo tanoubu i masigirigudui ie lau e mahana haligigi-hasina eai.

45 Mahana i wahuwahuhuri, eo numa tabuna woeona duaduari eai i tapurisi-helabuini.

Iesu earuana i torehebiga

Mt. 27.50; Mk. 15.37; Io. 19.30

46 Iesu abo ie eaba ma arina lailaina, i ene, “Tamagu e, earuagu ta ea leawa oa nimam eai”. Ena ribariba nei doha, abo i tubahai.

⁴⁷ Na Senturion wa, wau laulau wa ie ita, Eaubada abo i aihelahui, i ene, “Mamohoi teina ta taulaulaududuraina ede.”

⁴⁸ Tatao gamagamagari se oigogo wa bena se aiewai ginauri wa se itadi, nuapoudi se tubidi, eo se uiouio.

⁴⁹ Ia ehanayao gamagamagari, eo sisine hinage Galilaia eai ia se hemuriwataiyama, eda lohaloha eai se tororo, teina ginauri se itaitalaedi.

Se toretau

Mt. 27.57-61; Mk. 15.42-47; Io. 19.38-42

⁵⁰ Na, tau esau esana Iosepa, sunederi tauna esau, ia tau lolona, eo ena nuatu se dudurai:

⁵¹ (Ia ede sunederi eai wa edi laulau nige i saguidi;) ia Arimataia tauna, ludea edi eanua esau: ia hinage Eaubada ena basileia i bagibagiei.

⁵² Wau tau wa ie lau Pilato arinai, Iesu sinarena i awanorini.

⁵³ Ia sinarena wa i taruhidobeiyama, lulu linen arinai i sumasumaei, bousa eai ie tore, we'u se eatui wa gudana eai, sora nige tau esau arinai se tore.

⁵⁴ Nei asubenana ne esana ede Abinonoha, sabate hinage i hanahanauma.

⁵⁵ Eo sisine hinage, ia maenayao Galilaia eai se laoma, dobila se lauwatai, bousa wa eo sinarena edi abatorena se ita.

⁵⁶ Isi se uio, oeagi panepanedi eo eausi se ginauri nonohaidi; asubena sabate se aiyawasi doha edi laugagao wa.

24

Parabole: Iesu Keriso toroiona

Mt. 28.1-6; Mk. 16.1-8; Io. 20.1-17

¹ Na, asubena bagubagunana eai, sora nige mara ie tom, isi se laoma bousa eai, muramura wa se ginauri nonohaidi se ledima, eo hinage headi maedi.

² We'u wa bousa eai se ita se buihaiyao.

³ Isi se lulau, Guiau Iesu sinarena wa nige se lobai.

⁴ Isi nuadi se ponopono ariri, na tatao labui gegesidi eai se totoro adi lulu se namanamari:

⁵ isi ma matausidi, to matadi se durudurudobi tano eai, se ribalau aridi eai, si ene, "Aue saha maumaurina au eooi matematedi boeadi eai?"

⁶ Ia inai nige'e, na i toroo: omi Galilaia sora nige au laugabaei ena riba i ribalaowa arimiu eai au nuatui wa,

⁷ i ene, Tau Natuna abo se moselaei tatao baaea nimadi eai, abo se hesatauro, eo asubena hehaionana eai abo i torouio."

⁸ Ena riba wa abo se henuaisinidi.

⁹ Bousa eai se uio, teina ginauri gamagaridi saudoudoi-esega se heribadi, eo tatao headiyao hinage.

¹⁰ Ia ede Maria Magadala, eo Ioane, eo Maria, Iamesi sinana, eo sisine headi maediyao, isi teina ginauri gamagaridi aposotolo tauheribadi ede.

¹¹ Edi riba si ene doha piripiridai mo, isi nige se nuatuwataidi.

¹² Petero abo i toro, i aitautau ie lau bousa eai; ie durudobi nige ginauri esau i ita, lulu linen wa isibom se torehesuaradi i itadi, abo ie uio, ginauri wa se tubu wa i noonooedi.

¹³ Na, nei asubenana ne adi sasaguyao labui se lau eanua esau esana Emausa, Ierusalem a i laoma eanua wa edana lohana maila haligigi-esega.

14 Taudi labui edi ribariba paana ede teina ginauri gamagaridi se tubu wa.

15 Na, isi ma ribaribadi eo ma nuauatuidi, Iesu iabom i laoma maedi se laulau esega.

16 Isi matadi nige se lala arinai ia nige se ita lobai.

17 Ia i ribalau aridi eai, i ene, “Emi ribariba saha ina omi au ribariba ma laulaumi, eo ma nuadubumi hinage?”

18 Esau, esana Kaleopa, ia arinana i heuio, i ene, “Oa laolaoma tauna mo Ierusalem eai, ginauri wa nei eai se tubu teina asubenadi eai nige u nuatuidi?”

19 Ia ie ribalau aridi eai, i ene, “Ginauridi saha?” Isi se heriba si ene, “Iesu, Nasareta tauna, ribana, ia ede peroveta tauna Eaubada matana eai, eo tatao gamagaridi matadi eai, ena laulau eo ena riba se gigibori ariri.

20 Hinage kohena lailaidi eo ada tanuagao ia se moselaei, abo se unuhemate, eo ia se hesatauroyao.

21 Na, ai ema nuatu ai ene ia Isaraela abo i hemauidi: hinage ginauri wa se tubu wa i laoma e wau ta asubena hehaionana.

22 Mamohoi, ema pele sisinedi headi hinage se henoonoemai, isi maratomtomi eai se lau bousa eai;

23 ia sinarena nige se lobai, se laoma, si ene, aneru headi hinage se itadi, isi si ene ia i maurio.

24 Isi headi maemai se mia se lau bousa eai, hinage se ita doha hinage sisine wa se ribaei: ia mo nige se ita.”

25 Ia abo i ribalau isi aridi eai, i ene, “Omi eauyaure, eo nuamiu tai se porohe, riba gamaga-

magaridi peroveta se ribaedi nige au ataiedi:

²⁶ Keriso teina ginauridi taba i hearodi abo i lu ena namanamari eai, e nige'e?"

²⁷ Mose arinai ie tubu, eo peroveta gamagama-garidi, uriuri tabudi gamagamagaridi eai iabom mo ribana i ribahasahasaidi.

²⁸ Eanua wa, arinai se laulau wa, se lage hana-hanau: ia ana ao doha i taudaru mo.

²⁹ Isi mo ia se nuahi si ene, "U bawa maemai: paana i maimailahio, asubena i lauo." Ia i awasae numa eai ie bawa maedi.

³⁰ Na ia ie bawa hatahata eai maedi se aiai, falawa ie abi, eo i aihelahui, eo i ihi, abo i mosei aridi eai.

³¹ Isi matadi abo se lala, ia se italobai, ia matadi eai i tauyamui.

³² Taudi labui edi ribariba si ene, "Nuaboeada eai se alaalasi, ia dobila eai maeda ta ribariba wa, eo ia buka tabuna i hemasarahadi, e nige'e?"

³³ Nei mahanana eai ne isi se torohai, se uio Ierusalem, saudoudoi-esega se lobaidi se oigogo esega, eo adi sasaguyao hinage maediyao.

³⁴ Si ene, "Mamohoi, Guiau i toroo i tau-masaraha Simona arinai."

³⁵ Wau dobila eai wa wasana se heriheribadi, eo hinage areto ihina arinai ia se italobai.

³⁶ Ribana sora ma ribaribadi, na Iesu i toro isi boeadi eai, i ribalau aridi eai, i ene, "Loni au abi."

³⁷ Na isi se matausi ariri, eo se tagugu, edi nuatu si ene earuyarua se ita.

³⁸ Ia i ribalau aridi eai, i ene, "Omi saha au nuadubuei? Hari nuatu, hari nuatu, se saha nu-amiu eai se saesae?"

39 Nimagu eo aegu au itadi: eau mo ede ina, au abii tagu abo au ita; earua wa nige bulumana eo nige siadana, doha au ita ea abi ta.”

40 Ia ie riba ina doha ia nimana eo aena abo i heitadi.

41 Isi sora nige se awamamohoi paana se kode ariri, eo se noonoei, ia i ribalau aridi eai i ene, “Ami aiai, e nige’e?”

42 Eama se ligaauriyao tupona se mosei ia arinai, eo amoamo hinage.

43 Ia ie abi, eo matadi eai i aiai.

44 Ia ie ribalau aridi eai i ene, “Teina riba ta ia ede lahinae wa ea heribamiuo, eau sora nige ea laugabaemiu, ea ’ne, ginauri gamagamagari enagu Mose ena laugagaeo bukana eai, eo peroveta, eo wana eai se uridi abo se hemamohoi.”

45 Edi nuatu abo i hemasarahadi, isi bena uriuri tabudi aniodi abo se nuatulobaidi.

46 I ribalau aridi eai, i ene, “Ina doha se uriyao, ina doha hinage bena Keriso i amamna, eo asubena hehaionana eai mate eai i torouio;

47 ia esana debana eai basileia gamagamagari boeadi eai, nuabui eo baaea ribagigirina abo se lauguguaei, na Ierusalem eai se hetubu.

48 Omi teina ginauridi tauribaribaedi ede.

49 Na Tamagu ena ribahesunuma ea hetamariawa ta omi potamiu eai; Ierusalem eanuana eai au bawa i lau e gigibori ewa eai i laoma, abo se leawa.”

Iesu Keriso i seuio

Mk. 16.19-20; A. adi H. 1.9-11

50 Ia i woeaidi murimuri eai se lau Betania eai se lage, ia nimana i lauisinidi, i aihelahuidi.

⁵¹ Ia ma ribaribahelolodi na i tausuara, eo se abiisini galewa eai.

⁵² Isi ia se aihelahui, abo se uio Ierusalem eai, ma kode ariariridi.

⁵³ Isi numa tabuna eai se oigogo huia gamagamagari, Eaubada se hedebasae eo se aiaihelahui. Amen.

RIBA HARIHARIUNA
The New Testament and portions of the Old Testament
in the Suau language of Papua New Guinea
Buk Stat, Josua, Buk Song, Esodo, na Nupela Testamen
long tokples Suau long Niugini

Copyright © 1998 The Bible Society of Papua New Guinea

Language: Suau

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-19

PDF generated using Haiola and XeLaTeX on 25 Aug 2024 from source files dated 31 Aug 2023

99a191af-3177-577f-b12d-7c7288c64c37